



11

7 保
5143
24-11



門 保 4
號 5143
卷 24-11

同治
書

唐會要卷四十二

宋 蘇 養 孫 王 尚 書 請 溥 孫 三 不 撰 出 報 效

斷 屠 鈞 詔 蘇 養 孫 王 尚 書 請 溥 孫 三 不 撰 出 報 效

武德二年正月二十四日詔自今以後每年正月九日

及每月十齋日並不得行刑所在公私宜斷屠鈞

如意元年五月禁天下屠殺

聖歷三年斷屠殺鳳閣舍人崔融議曰春生秋殺天之

常道冬狩夏苗國之大事豺祭獸獺祭魚自然之理也

一乾豆二賓客不易之義也上自天子下至庶人莫不

唐會要

卷四十一

一

揮其鸞刀烹之鶴鼎所以充庖廚故能幽明咸通人祇輯穆百王千帝殊途同歸今若禁屠宰斷弋獵三驅莫行一切不許便恐違聖人之達訓紊明主之善經一不可也且如江南諸州乃以魚爲命河西諸國以肉爲齋一朝禁止倍生勞弊富者未革貧者難堪二不可也又如貧賤之流割割爲事家業儻失性命不全雖復日戮一人終慮未能總絕但益恐嚇唯長奸欺外有斷屠之名內誠鼓刀者眾勢利依倚請託紛紜三不可也雖好生惡殺是君子之用心而考古會今非國家之大體但

使順月令奉天經造次合禮儀從容中刑典自自然人得其性物遂其生何必改革方爲盡善

景龍元年遣使江淮分道贖生以所在官物充直中書舍人李乂上疏曰江南水鄉採捕爲業魚鼈之利黎元所資雖雲雨之私有沾于末類而生成之惠未洽于平人何則江湖之饒生育無限府庫之用支供易殫費之若少則所濟何成用之儻多則常支有關與其拯物豈若憂民且生鬻之徒惟利是視錢刀日至網罟年滋施之一朝營之百倍未若迴救贖之錢物減貧無之徭賦

治國愛人其福勝彼

景龍二年九月八日勅烏雀昆蟲之屬不得擒捕以求贖生犯者先決三十宜令金吾及縣市司嚴加禁斷先天元年十二月勅禁人屠殺雞犬

二年六月勅殺牛馬騾等犯者科罪不得官當蔭贖公私賤隸犯者先決杖六十然後科罪

開元十八年三月二十八日勅諸州有廣造簍漚取魚並宜禁斷

二十二年十月十三日勅每年正月七月十月三元日

起十三日至十五日並宜禁斷宰殺漁獵

二十三年八月十四日勅兩京五百里內宜禁捕獵如犯者王公以下錄奏餘委所司量罪決責

天寶五載七月二十三日河南道採訪使張倚奏諸州府今後應緣春秋二時私社望請不得宰殺如犯者請科違勅罪從之

六載正月二十九日詔今屬陽和布氣蠢物懷生在於含養必期遂性其滎陽僕射陂陳留蓬池自今以後特宜禁斷採捕仍改僕射陂爲廣仁陂蓬池爲福源池

七載五月十三日勅文自今以後天下每月十齋日不得輒有宰殺

至德二年十二月二十九日勅三長齋月并十齋日並宜斷屠鈞永爲常式

乾元元年四月二十二日勅每月十齋日及忌日並不得採捕屠宰仍永爲式

建中元年五月勅自今以後每年五月宜令天下州縣禁斷採捕弋獵仍令所在斷屠宰永爲常式并委州府長吏嚴加捉搦其應合供陵廟並依常式

貞元六年正月二十八日勅每年中和節及九月九日自今以後逼節放三日開屠

開成二年八月勅慶成節宜令內外司及天下州府但以素食不用屠殺永爲常式

會昌四年四月中書門下奏正月五月九月斷屠伏以齋月斷屠出於釋氏緣國初風俗猶近梁陳卿相大臣頗遵此教又弛禁不一只斷屠羊宰殺驢牛其數不少鼓刀者坐獲厚利糾察者皆受賄財比來人情其知此弊臣等商量正月一歲之首萬物生育之初請起元日

唐會要 卷四十一 四
斷三日每遇列聖忌日斷一日國家崇元祖之道竭嚴
奉之誠既以廣闡其風卽須參用其教仍望准開元二
十二年十月二十日勅正月七月十月三元日各斷屠
三日餘望並停緣斷屠日數既少法令所宜畫一望委
御史臺別條流聞奏從之

大中二年二月制爰念農耕是資牛力絕其屠宰須峻
科條天下諸州屠牛訪問近日都不遵守自今以後切
宜禁斷委所在州府長官并錄事參軍等嚴加捉搦如
有牛主自殺牛并盜竊殺者宜准乾元元年二月五日

勅先決六十然後准法科罪其本界官吏不鈐轄卽委
所在長吏節級重加科責庶令止絕

五年正月勅畿甸及天下州應屠宰牛犢宜起大中五
年正月一日後三年內不得屠宰仍切加禁斷如郊廟
饗祀合用牛犢者卽以諸畜代之其年五月勅壽昌節
天下不得屠殺

咸通十一年六月赦文其京城久旱未降雨間宜權斷
屠宰

天祐元年九月勅乾和節文武百寮諸道進奏官准故

事于寺觀設齋不得宰殺許設酒果脯醢

左降官及流人

貞觀十四年正月二十三日制流罪三等不限以里數量配邊要之州十五年四月勅犯叛逆免死配流人六歲之後仍不聽仕

垂拱四年十一月一日勅犯罪之色授以文武遠官年考未滿方便解退者宜令依舊重任續前考滿

長壽三年五月三日勅貶降官並令于朝堂謝仍容三五日裝束至任日不得別攝餘州縣官亦不得通計前

後勞考

開元七年三月十六日勅左降人考未滿間重有犯應解免及放歸田里者並申奏更據狀輕重量貶若是五流及餘犯自依常法

十年六月十二日勅自今以後准格及勅應合決杖人若有便流移左貶之色決訖許一月內將息然後發遣其緣惡逆指斥乘輿者臨時發遣

天寶五載七月六日勅應流貶之人皆負譴罪如聞在路多作逗遛郡縣阿容許其停滯自今以後左降官量

情狀稍重者日馳十驛以上赴任流人押領綱典晝時遞相分付如更因循所由官當別有處分十三載二月九日赦文左降官承前遭憂皆不得離任孝行之道所未宏通情禮之間深可哀恤如有此類並宜放還仍申省計至服滿日准法處分自今以後編入常式

乾元元年二月五日勅節文其左降官非反逆緣坐及犯惡逆名教枉法強盜賊如有親年八十以上及患在牀枕不堪扶持更無兄弟者許停官終養其流移人亦

准此

建中三年正月勅諸流貶人及左降官身死並許親屬收之本貫殯葬其造蠱毒移鄉人不在此限其年四月御史臺奏天下斷獄一切請待讞報以正刑名唯除殺人當罪自徒以上結竟者並徒置邊州京兆尹嚴郢駁奏曰臣伏以徒置邊州者流之異名流罪者有三等一例移配或恐未當其死罪除殺人之外有十惡重罪造偽刻印并主典僞用印及強盜光火等若一切免罪徒邊於法太輕不足懲戒其徒罪條目至多或

唐會要 卷四十一
鬪毆爭競小有傷損或夫妻離異不犯義絕或養男別
姓或立嫡違式或私行度關或相冒合戶如此之類不
可悉數今一切徒邊與十惡造偽同等卽輕重懸殊又
准刑部格京城殷雜憊犯百端觸網陷刑徒罪偏廣若
皆送覆繫滯實多其徒以下罪非除免官當及勅杖者
宜准外州縣例量事處分今若天下徒罪悉申所司皆
待讞報法司斷結准式有程州縣禁囚動盈千百計每
月徒配必不啻五六千人此則百姓動搖刑章紊撓又
邊州及近邊犯死罪及徒流者復何以處伏請下刪定

使詳覆然後施行從之

貞元三年七月詔停省天下州府官員其左降官仍舊
十一年五月左降官于邵劉敷並量移授官故事量移
六品以下官皆吏部旨授至是特制授之

元和六年閏十二月廬州奏量移官司戶參軍員外置
同正員顏頰母在揚州十二月二十七日身亡今請奔
喪者准貞元十八年五月十九日勅自今以後流人左
降官稱遭憂奔喪者宜令所司先奏聽進止

八年正月刑部侍郎王播奏天德軍五城及諸邊城配

流人臣等竊見諸處配流人每逢恩赦悉得放還唯前件流人皆被本道重奏稱要防邊遂令沒身終無歸日臣又見比年邊城犯流者多是胥徒小吏或是鬪打輕刑據罪可原在邊無益伏請自今以後流人及先流人等准格例滿六年後並許放還冀抵法者足以悛懲滿歲者絕其愁怨從之

十二年四月勅應左降官流人不得補職及留連宴會如擅離州縣具名聞奏其不聞奏者其罪亦重其年七月勅自今以後左降官及責授正員官等並從

到任後經五考滿許量移今日以前左降官等及量移未復資官亦宜准此處分考滿後委本任處州府具元貶事例及到州縣月日申刑部勘責俾吏部量資望位量移官仍每季具名聞奏并申中書門下其曾任刺史都督郎官御史并五品以上及常參官刑部檢勘其所犯事由聞奏中書門下商量處分其月勅左降官等考滿量移先有勅令因循日久都不舉行遂使幽遐之中恩澤不及自今以後左降官及量移未復資官亦宜准此處分如是本犯十惡五逆及指斥乘輿妖言不順假

託休咎反逆緣累及贓賄數多情狀稍重者宜具事由奏聞其曾任刺史都督郎官御史五品以上常參官刑部檢勘具元犯事由聞奏并申中書門下商量處分未滿五考以前遇恩赦者准當時節文處分其復資度數准元和二年六月二十七日勅

其年九月刑部奏准今年七月二十一日勅諸道左降官等經五考滿日許量移者其貶降日授正員官或無責辭亦是責授並請至五考滿然後許本任處申闕并餘左降官緣任處州府多是遐遠至考滿日其有申牒

稽遲致留滯者其刺史本判官錄事參軍等請與下考如考滿後雖已申牒未經量移問其祿料並准天寶貞元兩度勅文依舊支給其本犯十惡等罪已有正名仍請依舊從之

其年十月勅自今以後流人不得因事差使離本處十四年十一月吏部奏今請應責授官前制已改轉者各勒依今任考數停替日便放東西合選時任自參選不要反更有檢轄庶使人無疑滯事有指歸勅旨依奏長慶元年正月三日制應亡官失爵及放還流人如先

有莊田不經沒官被人侵射作主如本主及子孫已歸
並委州府卻還務令安業

四年四月刑部奏准其年三月三日起請准制以流貶
量移輕重相懸貶則降秩而已流爲擯死之刑部寺論
理條件聞奏今謹詳赦文流爲減死貶乃降資量移者
卻限年數流放者便議歸還准今年三月赦文放還人
其中有犯贓死及諸色免死配流者如去上都五千里
外量移校近處如去上都五千里以下者則約一千里
內與量移近處如經一度兩度移六年未滿者更與量

移亦以一千里爲限如經三度兩度量移如本罪不是
減死者請准制放還如左降官未復資遇恩滿五考者
請准元和十二年九月勅與量移又准今年正月德音
諸色流人與減一年除贓限外滿五年卽放還收敘其
配流在德音以後者不在減限又天德五城流人准長
慶元年正月三日制以十年爲限又限准三月十二日
勅縱遭恩赦不在放歸限今請待十年滿卽放歸仍任
取配流日計年數不在援引德音減年之限制可之
開成元年二月勅貶責降資授正員官員及曾經誤累

停免未經引用者並與進改左降官有事情可恕才用足稱者中書門下量才處分

四年五月勅諸州府有責授六品以下正員官起今以後宜委吏部許終四考滿與替仍先具事由申中書門下取指檢不得同尋常員闕使用

其年十月五日勅節文今後流人宜准名例律及獄官令有身名者六年以後聽赦無官爵者六年滿日放歸會昌六年五月赦書節文應徒流人在天德振武者官中量借糧種俾令耕田以爲生業

大中三年六月勅先經流貶罪人歿于貶所有情非惡逆任經刑部陳牒許歸葬絕遠之處仍量事給棺槨四年正月勅徒流人比在天德者以十年爲限旣遇鴻恩例減三年但使循環添換邊不闕人次第放歸人無怨苦其秦原威武諸州諸關先准格徒流人亦量與立限于七年如要住者亦聽其年十一月勅收復成維扶等三州建立已定條令制置一切合同其已配到流人宜准秦原威武等州流人例七年放還

其年五月御史臺奏起請赦書節文流人該恩例須磨勘文書雖曰放還尙爲拘絆其人經三度量移者赦書後委所在長吏子細檢勘無可疑者便任東西訖具名聞奏臣今條流其流人每每量移之時請委刑部具先流甚處相承牒准赦文當日放東西訖具名聞奏其流人未有處分者請委刑部准此磨勘牒報本道並其事由報臺庶免留滯五年十一月中書門下奏今後有配長流及本罪合死遇恩得減等者並勒將妻同去有兒女情願者亦聽如流人所在身死其妻等並許東西州

縣不在旬留情願住者亦聽

乾符二年九月十六日勅應殘疾篤廢犯徒流罪或是連累卽許徵贖如身犯罪不在免限其年十五以下者准律文處分

五年五月二十六日刑部侍郎李景莊奏配州府流人流刑三等流二千里至流三千里每五百里爲一等准律諸犯流應配者二流俱役一年稱加役流三千里役三年役滿及會赦免役者卽于配所從戶口例今後望請諸流人應配者依所配里數無要重城鎮之處仍逐

罪配之准得就近勅旨從之

酷吏

載初元年九月來俊臣主制大獄每鞫囚不問輕重多以醋灌鼻禁地牢中或盛之于甕圍炙以火絕其餘糧至有抽衣絮以噉之者又令寢處糞穢備諸苦毒但入新開獄者自非身死終不得出每有制書赦宥囚徒俊臣必先遣獄吏盡殺之然後宣示公卿入朝默遭收捕故每出必與家人訣曰不知重見否其月于都城麗景門內別置推事院

謂之新開獄

作大枷凡有十號一曰定百

脉二曰喘不得三曰突地吼四曰著卽承五曰失魂魄

六曰實同反七曰反是實八曰死豬愁九曰求卽死十

曰求破家

王宏義戲謂麗景門爲例竟門

天授二年正月御史中丞知大夫事李嗣真以來俊臣等用法嚴酷上疏曰臣聞陳平事漢祖謀疎楚君臣乃用黃金五萬觔行反間之術項王果疑臣下陳平反間遂行今告事紛紜虛多實少當有兇慝焉知必無陳平先謀疏陛下君臣後謀國家良善陛下昨語臣云我比來已作此意是愚臣管測先天而天弗違至如羅織之

徒卽疏問之漸陳平反問其遠乎哉王制曰凡用刑決獄以成告于正正聽之以獄成告于大司寇大司寇聽之棘木之下與孤卿大夫公侯伯子男以獄成告于王王命三公參聽之三公以獄成又告于王王三宥之然後制刑臣竊見比日獄官一單車使推訖萬事卽定法家隨斷不令重推或有臨時使決不待聞奏此權由臣下非審慎之法儻有冤濫何由可知況乎九品之官專命推覆按覆旣不在秋官官省審復不由門下事非可久物情駭懼老子云國之利器不可以示人今日假此

威權便是窺國家之利器也不可不慎長壽元年有上封事人言嶺南流人有陰謀逆者乃遣司刑評事萬國俊攝監察御史就案之若得反狀便許斬決國俊至廣州徧召流人擁之水濱以次加戮三百餘人一時併命然後鍛鍊曲成反狀仍誣奏云諸流人咸有怨望若不推究爲變不遙則天然其奏又命攝監察御史劉光業王德壽鮑思恭王處貞屈貞筠等分往劔南黔中安南嶺南等六道案鞫流人於是光業誅九百人德壽誅七百人其餘少者不減數百人時周興來

俊臣相次受制推究大獄又與侯思正王宏義郭霸衛
遂忠等招集告事者數百人其爲羅織以陷良善又造
羅織經一卷其意旨皆網羅前人織成反狀海內震懼
道路以目麟臺正字陳子昂上書曰臣聞之聖人出必
有驅除蓋天人之符應休命也日者東南微孽敢謀亂
常陛下順天行誅罪惡咸服豈非天意欲彰陛下神武
之功哉而執事者不察天心以爲人意惡其首亂倡禍
法合誅屠將息奸源窮其黨與遂使陛下大開詔獄重
設嚴刑冀以懲創于天下大或流血小禦魑魅今朝廷

惶惶莫能自固海內傾聽以相驚恐愚臣昧焉竊恐非
五帝三王伐罪弔人之意也頃年已來伏見諸方告密
囚累百千大抵所告皆以揚州爲名及其窮竟百無一
實遂使奸惡之黨快意相讎睚眦之嫌卽稱有密一人
被訟百人滿獄使者推捕冠蓋如市或謂陛下愛一人
而害百人天下喁喁莫知寧所伏願念之天下幸甚萬
年縣主簿徐堅上疏曰臣聞書有五聽之道慮失情實
也今著三覆之奏恐致虛枉也比見有勅勘當反逆命
使者得實便行決殺人命至重死不可生儻萬分之中

有一不實欲訴無路懷枉誰明飲恨吞聲赤族從戮豈不痛哉此不足肅奸逆而明刑典適所以長威福而生疑懼臣望絕此處分依法覆奏則死者甘伏知泣辜之恩生人歡悅見詳刑之意鳳閣舍人韋嗣立上疏曰臣聞堯舜之日畫其衣冠文景之時幾致刑措歷茲千載以爲美談今四海多銜冤之人九泉有抱痛之鬼並自揚豫之後刑獄漸興用法之伍務于窮竟連坐相牽數年不絕遂使巨奸大猾伺隙乘間內包豺狼之心外示鷹鷂之跡陰圖潛結其相影會構似是之言成不赦之

罪皆深爲巧詆恣行楚毒人不勝痛便乞自誣公卿士庶連頸受戮道路藉藉雖知非辜而鍛鍊已成辨占皆合縱臬陶爲理于公定刑則謂污宮毀樞猶未塞責雖陛下仁慈哀念恤獄緩死及覽辭狀便已周密皆謂勘鞠得情是其實罪雖欲寬捨其如法何于是小乃身誅大則族滅相緣共坐者不可勝言此豈宿構讎嫌將申報復皆圖苟成功効自求官賞當時稱傳謂爲羅織弄法舞文傷人實甚且如仁傑元忠俱罹枉陷被勘鞠之際亦皆以自誣向非陛下至明無以省察則菹醢之戮

已及其身欲望輸忠聖世安可復得陛下擢而升之遂各爲良輔國之棟幹稱此二人何乃前非而後是耶誠由枉陷與甄明耳陛下儻錄垂拱已來伏法者並追還官爵緣累之徒普沾恩造如此則天下皆知彼所陷罪元非陛下之意監察御史魏靖上疏曰夫酷吏者資矯佞以事君行刻薄以臨下矯佞似乎用意刻薄類乎無私侮憲害公弄權撓法臣見周興來俊臣等恣意騁暴縱虐含毒讎疾在位安忍朝臣罪遂情加刑隨意改當其時也囹圄如市朝廷以目旣而神靈不昧冤魂有託

竊見來俊臣身處極法者以其羅織良善屠陷忠賢籍沒以勸將來顯戮以謝天下臣又聞之道路上至聖主傍洎貴臣明知有羅織之事矣俊臣旣死推者獲功索元禮超遷裴談受賞中外稱慶朝野載安破其黨者旣能賞不逾時被其陷者豈可銜冤累歲且稱反之徒須得反狀唯據片辭卽請行刑拷楚妄加疑似何限臣又聞之郭霸自刺而唱快萬國俊被遮而遽亡崔獻可臨終膝拳于頂李敬仁將死舌至于臍備在人謠不爲虛說伯有晝見殆無以過此亦羅織之一據也臣以至愚

不識大體儻使平反者數人眾其詳覆來俊臣等所推大獄庶鄧艾獲申于今日孝婦不濫于昔時渙恩一流天下幸甚來俊臣所推鞠人身死籍沒者令三司重檢勘有冤濫者並皆雪冤聖歷元年則天謂侍臣曰往者來俊臣等推勘制獄朝臣遞相牽引咸承反逆中間疑有枉濫更遣近臣就獄親問皆得手狀承引不虛近日俊臣死後更無聞有反者然則已前受戮者不有冤濫耶夏官侍郎姚元崇對曰比破家者皆是枉酷自誣告者持以爲功天下號爲羅織甚于漢之黨錮陛下令近

臣就獄親問者近臣亦不得自保何敢動搖今日以後臣以一門百口保見在內外官吏無反者乞陛下得告狀收掌更不須推問則天大悅曰以前宰相皆順成其事陷朕爲淫刑之主

萬歲通天二年九月初契丹平命神兵道大總管河內王懿宗按撫河內諸州懿宗所過殘酷有犯法應死者必生取膽然後殺之雖流血盈庭言笑自若先賊帥何阿小攻陷冀州亦多屠害士女故時人號懿宗阿小爲兩河語曰唯此兩河殺人最多嫉之甚矣

神龍元年三月二日制故司僕少卿徐有功執事平恕
 追贈越州都督特受一子官又以劉光業王德壽王處
 貞劉景陽屈貞筠邱神勣來子珣萬國俊周興來俊臣
 魚承煜王景昭索元禮傅遊藝王宏義張知默裴籍焦
 仁亶侯思立郭霸李敬仁皇甫文備陳嘉言等二十三
 人自垂拱以來任濫殺人所有官爵並令追奪唐奉一
 李秦授曹仁哲依前配流至開元二年二月一日勅周
 利貞裴談張福貞張思敬王承劉暉楊允姜暉封行珣
 張知衛遂忠公孫琰鍾思廉等十三人皆為酷吏比周

興來俊臣侯思立等事跡稍輕並宜放歸草澤終身勿
 齒至十三年三月十一日勅周酷吏來子珣等身在者
 宜長流嶺南身沒子孫亦不許仕陳嘉言魚承煜皇甫
 文備傅遊藝宜配嶺南身沒子孫亦不許仕

元年建子月御史中丞敬羽貶夔州刺史初肅宗將收
兩京以國用
不足自得若虛敬羽以苛刻徵剝求進相繼為中丞皆
為上親信乃為大枷號劬尾榆著即問絕又臥囚于地
以門關輾其腹號肉餽不飽掘地為坑實以叢棘以敗
覆之囚至則臨坑以訊不服者投于萬刺之中人多濫
死又有裴昇畢曜亦以酷間時號毛敬裴畢

貞元二十一年二月貶京兆尹李實為通州長史實為

京兆尹自國哀已後殘害人吏悉不聊生無辜斃踣者甚眾及譴日市井歡呼人皆袖瓦礫將碎其首聞道獲免

元和十四年七月沂海觀察使王遂爲眾所殺遂初到鎮好以汙俗詆將卒曰反殘賊喜怒不中理其將王弁乘人心不堪率眾爲亂遂竟遇害始遂每有笞撻其杖率過制旣遇禍監使封其杖來獻命中使出示於朝以作誠焉

雜記

貞觀十一年正月勅在京禁囚每月奏自立春至秋分不得奏決死刑

十三年八月勅身體髮膚受之父母不合毀傷比來詆競之人卽自刑害耳目今後犯者先決四十然後依法十六年十月二十六日詔盜賊之作爲害實深州縣官人多求虛譽苟言盜發不欲陳告村鄉長正知其此情遞相勸止十不言一假有被論先劾物主爰及鄰伍久嬰縲紲有一於斯實虧政化自今以後勿使更然
永徽五年三月制州胥吏犯贓一匹以上先決一百然

後准法

六年十一月二十七日詔投匿名書國有常禁凡厥寮庶咸應具悉近遂有人向朝堂之側投書於地藏其姓名誣人之罪朕察其所陳皆極虛妄此風若扇爲蠹方深自今以後內外法司及別勅據事宜並依律文勿更別爲酷法其匿名書亦宜准律處分

永淳二年二月制官人犯決經斷後得雪者並申尙書省詳定前被枉斷及有妄雪者具狀聞奏

延載元年勅盜公私尊像入大逆條盜佛殿內物同乘

御物

神龍三年八月七日反逆緣坐人應沒官者年至十六以上並配嶺南遠惡州爲城奴

景雲二年九月二十六日勅新授官以上者不得更訴屈

開元三年二月勅禁別宅婦人如犯者五品以上貶遠惡處婦人配入掖庭

四年正月六日勅除長官以外因公事責決罰不過十下其使及專執當者不得過二十

二十二年十月九日勅犯罪逃走者其贓卽先徵納後捉獲推勘贓數減少不在卻還之限

天寶五載十一月五日勅其僞畫印宜用僞鑄印刻印之例處分永爲常式

九載十二月二十九日勅責情狀專知官有二十減十下自今以後判司縣令一人犯奪太守一季祿丞簿尉一人有犯與縣令中下考三人以上旣量事貶黜至建中元年二月十五日勅責情狀宜准格式處分至貞元六年十一月八日勅自今以後太守縣令有犯贓者宜

令加常式一等

元年建丑月二十一日京兆尹魏少遊奏令長職在親民丞簿尉有犯無不委悉比來各相蒙蔽悉徇人情百姓艱辛職由于此今以後丞簿尉有犯贓私連坐縣令其罪減所犯官二等冀遞相管轄不得爲非勅旨依天下諸州准此

乾元元年二月五日勅節文州縣佐官以下笞杖不得過十下以上須取長官處分

廣德元年七月十一日勅節文應天下刑獄大理正斷

刑部詳覆下中書門下處分

元和六年三月二十七日御史臺奏決囚准令以未後者不得至申時如州府及諸司已至未後者許至來日仍請勒本司官准制與御史同監行決從之

長慶二年九月勅應犯贓罪今後不得以散試官當罪元和三年四月勅應勳官及六品以下階宜准散試官例不得當罪

大中五年四月應勅諸道州府及京諸司所有推勘奏狀宜令具小節目狀于大狀前同進

今天下謂之小狀自此始也

七年四月六日勅法司斷罪每脊杖一下折法杖十下臀杖一下折笞杖五下則吏無逾制法守常規

武德元年戊寅爲上元之首則日月如合璧五星如連珠懸合于今日其二曰堯典云日短星昴以正仲冬前代造歷莫能允合臣今創法五十餘年冬至輒差一度則卻檢周漢千載無違其三曰經書日蝕毛詩爲先十月之交朔蝕辛卯臣今立法卻推得周幽王六年十月辛卯朔蝕卽能明其中間並皆符合其四曰春秋命歷序云魯僖公五年壬子朔旦冬至諸歷莫能符合臣今造歷卻推僖公五年春正月壬子朔日冬至則同自斯以降並無差爽其五曰古歷日蝕或在于晦或在二日

月蝕或有望前或在望後臣今立法月有三大三小則日蝕常在于朔月蝕常在于望卻檢魯史並無違爽其六曰前代造歷命辰不從子半命度不起虛中臣今造歷命辰起子半命度起于虛六度命合辰得中于子符陰陽之始會歷術之宜其七曰前代諸歷月行或有晦猶東見朔已西朧臣今已遲疾定朔永無此病疏奏上善之擢拜仁均員外散騎侍郎尋改太史令明年遂施行戊寅元歷至武德三年太史奏正月望及二月八月朔當蝕比不效其後中書令封德彝奏言歷詔吏部郎

中祖孝孫考其得失孝孫使算學博士王孝通以甲辰
厯法駁仁均所繆仁均援引答難孝孫乃略去尤疏闊
者餘依仁均舊時武德九年九月詔大理卿崔善爲考
正厯數善爲所改凡三十餘條至貞觀元年將仕郎李
淳風又奏駁太史厯十有八事詔下善爲課二家得失
其七條改從淳風餘一十一條並依舊也

十四年十一月甲子朔旦冬至初太史令傅仁均定厯
以癸亥爲朔旦詔下公卿八座詳議公卿以下奏曰伏
見李淳風表稱古厯分日起于子半勘得今歲十一月

當甲子合朔冬至故太史令傅仁均欲苟異張胄元法
減餘稍多子初爲朔遂差三刻用乖天正又南宮子明
薛績等並云子初及半日月未離淳風子午之法推校
春秋已來晷度薄蝕事皆符合奉勅付所司及公卿詳
加考定謹與國子祭酒孔穎達等一十一人尙書八座
參議得失惟仁均定朔事有微差淳風推校理尤精密
請從淳風議至十八年太史丞李淳風與司厯使士通
等上言故太史令傅仁均武德初云厯代已來日月薄
蝕或差于朔望者此由一月大一月小晦朔或致參差

今所制法三大三小日月之蝕必在朔望今依仁均造法一十九年九月後四月頻大卽仁均之術于古法有違詔令集諸解厯者詳之不能取定其後制令所造厯還依傅仁均平朔法迄于麟德元年至二年正月二十日以祕閣郎中李淳風所撰麟德厯頒于天下詔曰朕仰觀七曜傍總五家去其繁衍裁以要密古所未通今卽備載而改元之初占厯歲推甲子得于天正合朔之夜應以嘉祥五緯若連珠二曜如合璧以此授農升平可致昔洛下閎漢厯律云後八百歲當有聖人受之自

我大唐年將八百事異當仁朕亦何讓宜卽宣布永爲詒範可名曰麟德厯來年正月行用之又太史瞿曇羅上經緯厯法九卷詔令與麟德厯相參行

宏道元年十二月太史頒厯是月當小盡去八月有勅來年正月宜用朔故加癸未焉三十日癸未

神功二年閏十月二十六日制改正月爲閏十月臘月二日爲正月一日臘月詔曰頃者所司造厯以臘月爲閏稽考史籍便紊舊章遂令一歲之中晦仍見月重更尋討果差一日可以本月爲閏十月來月爲正月是歲

得甲子合朔冬至

神龍元年太史丞南宮說奏麟德歷加時浸疏遠詔更治乙巳元歷至景龍中成之

開元十六年八月十六日特進張說進開元大衍歷命

有司行用之先是九年太史頻奏日蝕不驗詔沙門一

年一行定草詔說成之因編以勒成一部經章十卷長

歷五卷歷議十卷立成法天竺九執歷二卷古今歷書

二十四卷略例奏章一卷凡五十二卷

乾元元年六月十七日頒山人韓穎等所造新歷每節後加舊歷二日

代宗用郭獻之五紀歷

德宗用徐承嗣貞元歷

元和二年二月司天徐昂造新歷成獻之詔名元和觀象歷

渾儀圖

貞觀初李淳風上言靈臺候儀是後魏遺範法制疎略難為占步上因令淳風改造渾儀鑄銅為之至七年三月十六日直太史局將仕郎李淳風鑄渾天黃道儀成奏之置于凝暉閣其制度以銅為之表裏三重下據準

基狀如十字末樹鼈足以表四極焉

第一儀名六合儀有天經雙規渾緯規金常規相結于四極之內備二十八宿十干十二辰緯三百五十五度第二儀名三辰儀圍徑八尺有璿璣規黃道規月遊規天宿矩度七曜所行并備于此轉于六合之內第三儀名四遊儀元樞爲軸以連結玉衡遊筭而貫約規矩又元樞北辰南距地軸傍轉于內又玉衡在元樞之間而南北遊仰以觀天之辰宿下以識器之晷度因撰法象志七卷以論前代渾儀得失之差

開元八年六月十五日左金吾衛長史南宮說奏渾天圖空有其書今臣既修九曜占書要須量校星象望請造兩枚一進內一留曹司許之

九年太史頻奏日蝕不效詔改新曆沙門一行奏曰今欲創歷立元須知黃道進退請更令太史測候時率府兵曹參軍梁令瓚待制于麗正書院因造游儀木樣甚爲精密一行乃上言曰黃道游儀古有其術而無其器以黃道隨天運動難用常儀格之故昔人潛思皆不能得今梁令瓚創造此圖日道月交莫不自然契合既于

推步尤要望就書院更以銅爲之庶得考驗星度無有
差舛從之至十三年造成游儀又上疏曰舜典云在璿
璣玉衡以齊七政說者以爲取其轉運者爲樞持正者
爲衡皆以玉爲之用齊七政之變知其盈縮進退得失
政之所在卽古太史渾天儀也自周室衰微疇人喪職
其制度遺象莫有傳者漢興丞相張蒼首創律歷之學
至武帝詔司馬遷等更造漢歷乃定東西立晷儀下漏
刻以追二十八宿相距星度與古不同故唐都分天部
洛下閎運算轉歷今赤道歷星度則其遺法也後漢永

元中左中郎將賈逵奏曰臣前上傅安等用黃道度日
月弦望多合近太史官一以赤道度之不與天合願請
太史官日月宿簿及星辰晷度與待詔星官考校奏可
問典星待詔姚崇等十二人皆曰星圖有規法日月實
從黃道官無其器不知施行甘露二年大司農丞耿壽
昌奏以圓儀度日月行考驗天運日月行赤道至牽牛
東井日行一度月行十五度至婁角日行一度月行十
三度此前代所共知也是歲永元四載也明年始詔太
史造黃道銅儀冬至日在斗十九度四分度之一與赤

道定差二度史官以校日月弦望雖密近而不爲望日
銅儀黃道與度運轉難候是以少終其事其後劉洪因
黃道渾儀以考月行出入遲速而後世治厯者不遵其
法更從赤道命文以驗賈逵所言差謬益甚此治厯者
之大惑也今靈臺鐵儀後魏明元時都匠解蘭所造規
製樸略度刻不均赤道不動乃如膠柱不置黃道進退
無準此據赤道月行以驗入厯遲速多者或至十七度
少者僅出十度不足以上稽天象敬授人時近秘閣郎
中李淳風著法象志備載黃道渾儀法以玉衡旋規別

帶日道傍列二百四十九交以推月遊用法頗雜其術
竟寢臣伏承旨更造游儀使黃道運行以追列舍之變
因二分之一以立黃道交于軫奎之間二至陟降二十
四度黃道之內又施白道月環用究陰陽朏朧之數動
合天運簡而易從足以制器垂象永傳不朽于是上親
爲製銘置之于靈臺以考星度二十八宿及中外官與
古經不同者凡數十條又詔一行與梁令瓚及諸術士
更造渾天儀鑄銅爲之若圓天之象上具列宿赤道及
周天度數注水激輪令其自轉一日一夜天轉一周又

唐會要 卷四十二
別置二輪絡在天外綴以日月令得運行每天西轉一
而日東行一度月行十三度十九分度之七凡二十九
轉有餘而日月會三百六十五轉而日行而仍置木櫃
以爲地平令儀半在地上半在地下晦明朔望遲速有
準又立二木人于平地之上前置鐘鼓以候辰刻每一
刻則自然擊鼓每一辰則自然撞鐘皆于櫃中各施輪
軸鉤鍵交錯關鎖相持既與天道合同當時甚稱其妙
鑄成命之曰水運渾天俯視圖置于武成殿前以示百
寮無幾而銅鐵漸澁不能自轉遂收置于集賢院不復

行

測景

儀鳳四年五月太常博士檢校太史令姚元辯奏于陽
城測影臺依古法立八尺表夏至日中測影有一尺五
寸正與古法同調露元年十一月十一日于周立測影
臺所得圭長二尺七寸

開元十二年四月二十三日命太史監南宮說及太史
官大相元太等馳傳往安南朗蔡蔚等州測候日影迴
日奏聞數年伺候及還京與一行師一時校之安南景

北極高二十一度六分冬至日影長在表北七尺九寸

四分春秋二分影二尺九寸三分夏至影在表南三寸

三分測影使者大相元太云交州望極纔出地二十餘度以八月自海中南望老人星殊高老人星下眾

星燦然其明大者甚眾圖所不載莫辨其名大率去南極二十度已上其星皆見自古渾天家以為常沒地中伏而不見蔚州橫野軍北極高四十度冬至影一丈五尺八寸九分春秋二分影六尺六寸二分夏至影在表

北二尺二寸九分此二所為中土南北之極真朗襄蔡

許河南府滑太原等州各有使住並差不同一行以南

北日影校量用句股法算之大約南北極相去纔八萬

餘里其諸州測影尺寸如左林邑國北極高十七度四

分冬至影在表北六尺九寸定春秋分影在表北二尺六寸五分夏至影在表南五寸七分安南都

護府北極高二十一度六分冬至影在表北七尺九寸四分定春秋分影在表北

二尺九寸三分夏至影在表南三寸三分朗州武陵北極高二十九度五分

冬至影在表北一丈五寸三分定春秋分影在表北四尺四寸七分夏至影在表北七寸七分襄州

分影在表北四尺八寸蔡州武津館北極高三十三度八分冬至影在表北一丈二尺三寸八分夏至影在表北一尺三寸六分許州扶溝北極高三十四

度三分冬至影在表北五尺三寸七分夏至影在表北一丈二尺五寸定春秋分影在表北五尺三寸七分夏至影在表北一丈二尺五寸

河南府告成北極高三十四度七分冬至影在表北一丈二尺七寸

一分定春秋分影在表北五尺四寸
 五分夏至影在表北一尺四寸九分
 北極高三十四度八分
 冬至影在表北一丈二尺八寸
 五分定春秋分影在表北五尺
 五寸夏至影在表北一丈二尺八寸
 北一尺五寸三分
 滑州白馬北極高三十五度三分
 影在表北一丈三尺定春秋分影在表北五尺
 尺五寸六分夏至影在表北一尺五寸七分
 太原府
 分影在表北六尺
 蔚州橫野軍北極高四十度
 冬至影在表北
 九分定春秋分影在表北六尺六寸
 二分夏至影在表北二尺二寸九分

地震

貞觀十二年正月二十二日松叢二州地震壞人廬舍
 二十年九月十五日靈州地震有聲如雷二十三年八

月晉州地震壞人廬舍壓死者五十餘人三日又震十

一月五日又震

永徽元年四月一日地震六月十二日又震上以晉地
 屢震謂羣臣曰朕政教不明使晉地屢有震動侍中張
 行成曰天陽也地陰也君象陽臣象陰君宜動轉臣宜
 安靜今晉州地震彌旬不休臣恐女謁用事大臣陰謀
 且晉州陛下本封今地屢震尤彰其應伏願深思遠慮
 以杜其萌帝深然之

九年三月丙辰雋州地震晝夜八十震壞廬舍死傷者

百餘人

十五年閏正月京師地震半刻已下

開元二十二年二月十八日秦州地震令右丞相蕭嵩

致祭山川又令倉部員外郎韋伯陽往宣慰存恤所損

之家委隨事處置間奏先是秦州百姓聞州西北地下

人廬舍悉崩毀地裂而復合經時不定壓死官吏及百姓四千餘人

至德元年十一月河西地震有聲圻裂陷廬舍張掖酒

泉尤甚二年三月河西又震

大曆四年二月十六夜京師地震有聲如雷

建中四年三月甲子京師地震生毛或白或黃有長尺

餘者其年五月辛巳夜京師地又震

貞元三年十一月京師地夕三震巢鳥驚散東都蒲陝

地並震

四年正月庚戌上御丹鳳門宣赦是夕京師地震辛亥

又震丁卯又震庚午又震詔修政以答天譴癸酉又震

乙亥又震是月金州房州地震尤甚江湓山裂屋宇摧

壞至二月辛未又震甲申又震乙酉又震丙申又震已

未京師又震庚午又震三月甲寅又震四月丙寅又震

八月甲午又震其聲如雷上謂宰相曰朕寡德數震當
修政道以答災譴甲午又震

九年四月辛酉京師地震有聲如雷河中關輔尤甚壞
屋壁廬舍或地裂湧出水

十年夏四月戊申京師地震癸丑又震

十三年七月乙未司天監奏今日午時地震從東來須
臾而止

元和七年八月京師地震上謂宰臣曰昨者地震草樹
皆動搖何祥也宰臣李絳曰在昔元元皇帝以大聖明

睿通于天人之理因周三川之震云天地之氣不過其
序若過其序人政亂也人政乖錯則上感陰陽之氣陽
伏而不能出陰迫而不能升於是地震又孔子修春
秋所紀災異先地震日蝕蓋地載萬物日為君象政有
感傷天地見書之示戒用儆後王伏願陛下勉勵虔
恭之戒動以利萬物緩萬方為念則變異自消休徵自
致

開成元年二月京師地震屋瓦皆墮二年十一月乙丑
京師地震

大中三年十一月京師地震振武天德靈武夏州鹽州皆奏地大震壞軍城廬舍雲迦鎮使及荆南押防秋兵馬小使並壓死僉卒死者數十輩

十四年五月庚戌京師地震山谷禽獸驚走

咸通八年五月丁未河中晉絳三州地大震廬舍壓仆傷人有死者

乾符三年雄州奏自六月地震至七月不止壓傷人甚

眾皆感其災入城避出城避險上無刻期之象
晉書日蝕人文歷國風三川之雲云天此之象不復其

高祖朝四 武德元年十月壬申朔四年八月丙戌朔

六年十二月壬寅朔九年十月丙辰朔

太宗朝十五 貞觀元年閏三月癸丑朔九月庚戌朔

二年三月戊申朔七月乙巳朔三年八月己巳朔四年

正月丁卯朔六年正月乙卯朔九年閏四月丁卯朔十

一年三月丙戌朔十二年閏二月庚辰朔十三年八月

辛未朔十七年六月己卯朔十八年十月辛丑朔二十

年閏三月癸巳朔二十二年八月己酉朔

高宗朝十二 顯慶五年六月庚午朔乾封二年八月

已丑朔總章二年六月戊申朔咸亨元年六月壬寅朔
 二年十一月甲午朔三年十一月戊子朔上元元年三
 月辛亥朔調露二年四月乙巳朔十一月壬寅朔開耀
 元年十月丙寅朔永淳元年四月甲子朔十一月庚申
 朔

天后朝十三 垂拱二年二月辛未朔四年六月丁亥
 朔天授二年四月壬寅朔如意元年四月丙申朔長壽
 元年九月丁亥朔三年九月壬午朔延載元年九月壬
 午朔證聖元年二月己酉朔聖歷三年五月乙酉朔久

視元年五月己酉朔長安二年九月乙丑朔三年三月

壬戌朔九月庚寅朔

中宗朝二 神龍三年六月丁卯朔景龍元年十二月

乙丑朔

睿宗朝一 太極元年二月丁卯朔

元宗朝十七 先天元年九月丁卯朔開元三年七月

庚辰朔六年五月乙丑朔七年五月己丑朔九年五月

乙巳朔十二年閏十月壬辰朔十七年十月丙午朔二

十年二月癸酉朔八月辛未朔二十一年十月己丑朔

二十二年十二月戊子朔二十三年閏十一月壬午朔
二十六年九月丙申朔二十八年三月丁亥朔天寶元
年七月癸卯朔五載五月壬子朔十二載六月乙丑朔
肅宗朝二上元二年七月癸未朔蝕既大星皆見至
德元年十月辛巳朔
代宗朝二大曆三年三月己巳朔四年正月庚午朔
德宗朝七貞元三年八月辛巳朔日有蝕之有司奏
準禮請伐鼓于社未許太常卿董晉奏曰伐鼓于社所
以責羣陰助陽光也所宣詔命不合經義奏請不報竟

不伐鼓六年正月戊戌朔先是有司奏元日太陽虧遂
罷朝會至時不蝕百寮稱賀七年六月庚寅朔先是司
天監奏是日太陽虧至時以陰雲不見百寮稱賀八年
十一月壬子朔日有蝕之上不視朝司天監徐承嗣奏
據歷數合蝕八分今退蝕三分計減強半準古君盛明
則陰匿而潛退請宣示朝廷編諸史冊詔付所司十年
三月壬寅司天奏四月癸卯朔太陽虧已後五刻蝕既
未後五刻復滿者舊例合宣行太常博士姜公復狀奏
準開元禮太陽虧皇帝不視事其朝會合停勅旨依奏

至時陰雲不見百官表賀十二年八月乙未朔十七年

五月壬戌朔

憲宗朝五月元和三年七月癸巳上謂宰臣曰昨太史奏太陽虧及朔日上瞻如言皆驗其故何也又素服救日之儀有何所憑李吉甫對曰日月運行遲速不齊凡周天三百六十五度有餘日行一度月行十三度有餘率二十九日半而與日會又月行有南北九道之異或進或退若晦朔之交又南北同道即日爲月之所掩故有薄蝕之變雖自然常數可以推步然日爲陽精人君

之象若君行有緩急即日爲之遲速稍逾常制爲月所掩卽陰侵于陽亦猶人君行或失中應感所致故禮記云男教不修陽事不得謫見于天日爲之蝕婦順不修陰事不得謫見于天月爲之蝕古者日蝕則天子素服而修六官之職月蝕則后素服而修六宮之職所以懼天戒自省惕也君人者居物之上易爲驕盈故聖人制禮務乾恭兢惕以奉順天道苟德大備則天人合應百福來臻陛下恭已嚮明日慎一日又顧憂天譴則聖德益固昇平何遠伏望長保睿志以永無疆之休臣等不

勝歡幸之至因與同列稱賀上深然其言謂吉甫等曰書傳皆言天人交感妖祥應德蓋如卿說且素服救日乃自貶之旨朕自維不德實懼有以致譴咎載深兢惕卿等當悉心務理匡我不逮也十年八月己亥朔十三年六月壬子朔

穆宗朝一 長慶二年三月大禮院奏四月一日太陽虧準開元禮其日廢務皇帝不視事居數日上謂戶部尚書韋綬曰災可禳福可禱乎對曰可以德禳宋景公善言而罰星爲之退舍是也福不可以求致故漢文帝

於祠祀命有司敬而不祈用能變已成之災享自致之福著于史傳其理甚明今人或不慎行以祈災銷媚于神而冀福至神苟有知當因致譴上深然其言

文宗朝三 太和八年二月壬午朔開成元年正月丙辰朔二年十二月庚寅朔司天奏是日太陽虧至時陰雪不見

武宗朝四 會昌三年二月庚申朔四年三月甲寅朔五年七月丙午朔六年十二月戊辰朔

宣宗朝一 大中二年五月己未朔

昭宗朝一 天祐元年十月辛卯朔蝕在心宿初度十五分之三

哀帝朝一 天祐三年四月癸未朔蝕在畢十二度屬趙分太常禮院奏準故事伐鼓于社皇帝素服避正殿百官素服各守本局于廳事前重行每等異位向日端立俟復明而止

月蝕

高祖朝八 武德元年九月丁巳望二年閏二月己卯望四年十二月丁卯望六年六月庚申望十二月丁巳

望七年十一月乙卯望八年四月乙卯望九年十月庚午望

太宗朝十八 貞觀二年二月壬辰望三年二月丁亥望八月甲申望四年七月戊寅望六年六月丁酉望十一月乙未望七年五月辛卯望九年九月戊申望十一年九月丁酉望十三年正月乙未望十四年七月庚戌望十二月丁未望十五年十二月乙酉望十七年十月辛酉望十八年十月乙卯望二十一年八月庚申望二十二年四月乙巳望二十三年十二月乙酉望

高宗朝二十五 永徽元年六月壬午望十二月辛巳
 望二年六月丁丑望十一月甲戌望四年十月癸巳望
 五年九月戊子望顯慶二年閏正月甲辰望七月辛丑
 望龍朔元年十一月丙午望二年五月甲申望麟德元
 年九月庚申望乾封二年閏十二月辛未望總章二年
 十二月庚申望咸亨元年六月丁巳望三年四月壬戌
 望十月癸丑望四年四月庚午望上元二年八月丙戌
 望儀鳳元年二月甲申望二年七月乙亥望永隆元年
 九月乙酉望十二月丁酉望永淳元年三月戊申望二

年九月庚子望 天授元年二月丁巳望八月甲午望垂
 天后朝十九 文明元年二月丁巳望八月甲午望垂
 拱二年七月癸丑望三年十月乙巳望四年六月辛巳
 望永昌元年十月甲子望載初元年四月辛酉望天授
 二年十月乙酉望長壽二年二月乙亥望證聖元年七
 月辛酉望通天二年六月乙酉望聖曆二年正月辛未
 望三年正月丙寅望九月辛卯望大足元年九月乙酉
 望長安二年九月庚辰望三年八月癸酉望四年正月
 壬寅望七月戊戌望

中宗朝三 神龍元年正月丙申望二年十二月甲申望景龍元年十月巳丑望

睿宗朝三 景雲二年八月丁巳望太極元年三月乙卯望八月辛未望

元宗朝十一 開元二年十二月戊辰望三年十二月壬戌望四年六月庚申望五年五月甲寅望六年十月丙子望十年二月丁亥望十一年正月辛巳望七月戊寅望十二年七月癸酉望天寶三載十一月丁未望肅宗朝二 乾元二年二月癸酉望八月丁卯望

代宗朝二 寶應元年十二月庚申望永泰三年三月辛未望

蘇氏曰載月甚詳然仲尼修春秋二百四十二年日星之變必書而月蝕不紀解之者云月諸侯道也夷狄象也彼有虧則王者中國之政勝矣故不謂爲災或云蓋取詩人彼月而蝕則惟其常之義會要亦國史之支也學于史宜取法春秋以是不宜備書

貞觀八年八月二十三日有星孛于虛危歷于元枹凡
 十一日乃滅太宗問虞世南曰是何妖也對曰昔齊景
 公時有彗見晏嬰對曰君穿池沼畏不深築臺榭畏不
 高行刑罰畏不重是以天見彗星為公戒耳景公懼而
 高其臺築其榭而深其池天不見彗矣
 武德九年二月二十三日有星孛于胃昴之間二十八
 日又有星孛于卷舌
 貞觀八年八月二十三日有星孛于虛危歷于元枹凡
 十一日乃滅太宗問虞世南曰是何妖也對曰昔齊景
 公時有彗見晏嬰對曰君穿池沼畏不深築臺榭畏不
 高行刑罰畏不重是以天見彗星為公戒耳景公懼而
 高其臺築其榭而深其池天不見彗矣
 武德九年二月二十三日有星孛于胃昴之間二十八
 日又有星孛于卷舌

唐會要卷四十三

變者此謂彗也自前漢至後漢
 彗孛亦曰孛宋書曰言王于世不溥
 彗孛字彗六國書曰彗孛且
 武德九年二月二十三日有星孛于胃昴之間二十八
 日又有星孛于卷舌

武德九年二月二十三日有星孛于胃昴之間二十八日又有星孛于卷舌

貞觀八年八月二十三日有星孛于虛危歷于元枹凡
 十一日乃滅太宗問虞世南曰是何妖也對曰昔齊景
 公時有彗見晏嬰對曰君穿池沼畏不深築臺榭畏不
 高行刑罰畏不重是以天見彗星為公戒耳景公懼而

修德十六日而星滅臣聞政德不修雖麟鳳數見終無補也苟政教無闕雖有災變何損于時伏願陛下勿以功高古人而自矜大勿以太平漸久而自驕惰慎終如始彗何足憂太宗曰吾十有八舉義兵二十四定天下二十九卽帝位三代以來撥亂之主莫臻于此頗有自矜之意以輕天下之士此吾之罪也上天見變良有是乎秦始皇平六國隋煬帝富有四海旣驕且逸一朝而敗吾亦何得自驕也言念于此不覺惕懼魏徵進曰自古帝王未有無災變者但能修德災變自銷溫彥博進

曰宋公一言星三徙舍陛下見變而懼災其銷乎

十三年三月二十二日有星孛于畢昴

十五年六月十九日有星孛于太微犯郎位七月甲戌

滅

總章元年四月有彗見于五車上避正殿減膳令內外五品以上各上封事極言得失許敬宗上言星雖孛而光芒小此非國管不足上勞聖慮請御正殿復常膳不從敬宗又進曰星孛于東北王師問罪此高麗將滅之徵上曰我爲萬國之主豈得推過於小藩哉二十二日

星滅

上元二年十月十三日彗見于角亢之南長五尺

三年七月二十一日彗見于東井指南河積薪長三尺

餘漸向東北光芒益衰長半天埽中台指文昌經五十

八日乃滅

八月十九日御史大夫樂彥璋卒

永隆二年九月一日萬年縣女子劉靜凝乘白馬著白

衣男子從者八九十人入太史局昇令廳床座問比見

有何災異太史令姚元辨執之以聞是夜彗見天市中

長五尺漸小向東行出天市至河鼓右旗十七日滅

永淳二年三月十八日彗見于五車之北凡二十五日

滅四尺漸行向東北懸星畢散終其辰時彗散至太

文明元年七月二十二日西北方有彗長丈餘經四十

二日滅

光宅元年九月二十九日有星如半月見西方

景龍元年十月十八日有彗見于西方四十三日滅

二年七月七日有星彗于胃昴之間

三年八月八日有星孛于紫微垣

太極元年七月四日有彗入太微垣

延和元年六月彗自軒轅入太微至大角滅

時睿宗以爲彗者除

舊布新之象乃下詔傳位太子

開元十八年六月十一日彗見于五車三十日有星孛于畢昴

二十六年三月八日有星孛于紫微垣中歷斗魁十餘日因陰雲不見

乾元三年四月二十七日彗見于東方在婁胃閒色白長四尺疾行向東北歷昴畢觜參井鬼柳軒轅宿至太微西右執法西七尺許滅凡經五十餘日

上元元年閏四月二十一日妖星見于西方長數丈至

五月滅

大曆元年十二月十七日彗見于匏瓜芒漸侵宦者星長尺餘二旬滅

五年四月二十七日彗出于五車長五丈餘六月二十八日滅

七年十二月二十日長星見

元和十二年正月戊子彗見于畢南指西南凡三日南近參旗滅

長慶元年正月二十一日有星孛于東南方二十九日又有星孛于辰上

太和二年七月甲辰彗出右攝提南二尺

八年九月辛亥夜彗起太微越郎位西北五日乃滅庚申彗復出東方長三尺芒耀甚偉

開成二年二月丙午夜彗出東方長七尺在危西指南斗辛酉彗復出長丈餘直西行稍南指在虛一度半壬戌漸長二丈餘廣三尺在女九度三月乙丑夜彗長五丈岐分兩尾其一指氏其一掩房至戊辰漸長八丈西

北行在張十四度

勅尚食云自後每一日食料分爲十日乃停內中修造以答天譴

三年十月十九日有彗出于辰上長二丈餘二十日夜見于辰上長三丈五尺二十一日夜見于辰長三丈餘西指軫東南星二十二日夜見于辰長三丈五尺餘西指軫魁

四年正月三十日有彗見于室南厯壁奎婁胃等宿至閏二月十三日又見于卷舌北凡三十有三日後二十四日二十五日陰二十六日晴已滅

會昌元年十一月六日有彗見于西南室宿之分凡五

十六日滅

大中十一年九月乙未彗出于房長三尺

光啟二年五月星孛于箕尾厯北斗攝提

天祐二年四月甲辰夜彗起北河貫文昌長三丈在西

北方詔以孛彗謫見放京畿軍鎮諸司禁囚常赦不原

外罪無輕重遞減一等限三日內疏理

其年五月乙酉夜西北彗星長六七十丈自軒轅大角

及天市西垣光芒猛怒其長竟天

五星臨犯

武德五年十二月甲戌太白犯軒轅

七年六月三日熒惑犯左執法

尚書右僕射蕭瑀

八年九月二十二日熒惑入太微

九年五月傅奕密奏太白晝見于秦秦國當有天下高

祖以朕授太宗及太宗即位召奕謂曰汝前奏事幾累

于我然今日之後但須悉心盡言無以為慮

貞觀十三年五月熒惑犯右執法

司空長孫無忌上表請遜位不許

十五年二月十五日熒惑逆行犯太微東藩上相

十七年正月

月十七日特進魏徵卒

十七年三月七日熒惑守心前星十九日退其月二十

二日又犯鉤陳四月一日大理囚統于承基上變稱太

為庶人元昌並賜死吏部尚書侯君集誅六月十九日

尚書右僕射高士廉遜位七月二十日司空房元齡丁

其年九月二十九日熒惑犯太微西藩上將

十九年九月二十四日太白在太微犯左執法光芒相

及十二月十四日

永徽三年六月二日熒惑犯右執法三日太白入太微

犯右執法四年正月侍中宇文節配流桂州九月十三

日右僕射張行成薨十二月侍中高季輔卒

顯慶五年二月三日熒惑入南斗

龍朔元年七月十四日太白犯太微左執法

乾封三年五月十日熒惑入軒轅

咸亨元年十二月熒惑入太微

上元二年正月九日熒惑犯房星

儀鳳四年四月九日熒惑入羽林

調露二年五月二十四日太白經天

長安四年熒惑入月及填星犯天關太史令嚴善思奏

臣下謀上之象歲

餘誅張易之兄弟

神龍二年九月十一日熒惑犯左執法

其月十七日左散騎常侍李懷

遠卒

景龍三年六月八日太白晝見于東井

景雲二年三月二十七日太白入羽林

其年八月十七日歲星犯左執法

竇懷貞請罷所職為安國寺奴罷職從之

為寺奴不許

蘇氏議曰吉凶悔吝惟人所召人守中道天不上變豈有位登宰輔名踐國公以諂諛為政事用姦妄為身計而欲以上穹示誠下就臧獲其可得乎先天之

誅天道不昧矣

太極元年二月三日熒惑入東井四月十二日熒惑與

太白守東井

先天元年八月十六日太白襲月

開元十年七月二十九日熒惑入南斗

天寶十三載五月熒惑守心五十餘日

至德元年十一月二十六日熒惑與太白同犯昴

大歷四年三月三日熒惑守上相經二十一日退入氏

十一月十九日門下侍郎同中書門下平章事杜鴻漸卒七月十二日熒惑入羽林

九年六月十三日熒惑入太微

貞元三年閏五月戊寅太白晝見四十餘日

其年六月癸卯熒惑退行入羽林

六年五月戊辰太白與月并閒容一指戊寅熒惑犯垣

星不及者一寸

八年十月乙酉太白犯太微左執法

十年夏四月太白晝見

十一年八月熒惑太白犯上將星

其年北平王馬燧薨

二十一年正月巳酉太白犯昴

永貞元年十二月巳酉歲星犯太微西垣東共

元和十五年七月庚申熒惑退行入羽林

長慶元年八月壬辰太白犯太微垣南第一星一尺所

九月戊戌入太微

四年二月癸卯太白犯東井北轅三月甲子熒惑犯歲

星壬申太白犯東井八月丁丑熒惑犯垣星癸未犯東

井丁亥復入東井己丑太白犯軒轅右角

寶歷元年九月癸未太白犯南斗

太和六年九月癸卯熒惑入太微犯右執法

九年八月二日太白犯太微
 其年九月八日熒惑犯氐西南星二十八日又犯鉤鈴
 開成元年十月三日熒惑入氐
 二年五月十二日太白犯畢十月二十五日又犯房
 三年五月五日太白犯輿鬼六月二日犯熒惑二十八
 日又犯右執法十月七日又犯南斗
 會昌元年九月癸巳熒惑犯輿鬼閏九月丁酉貫鬼宿
 戊戌在鬼中
 二年六月乙丑熒惑犯歲星丙寅太白犯東井

三年七月癸巳熒惑蒼赤色動搖于井中至八月十六
 日犯輿鬼
 四年五月戊午太白犯填
 五年二月五日太白掩昴北側在昴宿一度五月辛酉
 太白入畢口距星東南一尺八月七日太白犯軒轅大
 星九月二十九日熒惑犯上將星
 大中十一年八月熒惑犯東井

星聚

武德二年三月二十七日太白辰填聚于東井

九年六月十一日辰歲會于東井二十三日辰歲又會于東井

貞觀十八年五月太白辰會于東井

十九年九月太白入太微時太宗平高麗初下白巖城也

二十年七月丁未歲星守東壁

景雲二年七月太白填同在張宿

太極元年四月熒惑太白同守東井

至德二載四月乙酉太白與熒惑集于東井

乾元元年四月庚戌熒惑與填星聚于營室時上立張氏為皇后

大曆三年七月五星聚于東井九月四星聚于東井

貞元四年乙亥熒惑歲填三星聚營室三十餘日

六年閏四月庚戌太白辰聚于東井

元和十一年五月丁卯辰星與歲會東井六月己未辰星歲星會于東井相去一尺十一月戊子填熒惑會于

虛危

十四年八月丁丑太白辰星歲星聚于軫

太和九年八月三日太白熒惑會于角五度

開成四年正月丙辰熒惑太白辰會于南斗

流星

武德三年十月三十日有流星墜于東都城內殷殷有聲高祖謂侍臣曰此何祥也起居舍人令狐德棻曰司馬懿之伐遼東也有流星墜遼東梁水上尋而公孫淵敗走晉軍追之至其星墜所斬之此王世充滅亡之兆也

貞觀十六年六月甲辰有流星狀如月西南流三丈乃滅

十八年五月五日有流星如斗出東壁光照地聲如雷

景龍二年三月十九日有大星墜于西南有聲如雷野雉皆雊

景雲二年八月十七日東方有流星出五車至上台

其年九月十二日北方有流星出中台至相滅

十月三日韋安

石郭元振張說李日知並罷相

太極元年正月二十一日有流星出太微至相而滅

天寶二年閏二月十七日有流星如月墜于東南有聲

元和二年十二月己巳西北角有流星互天尾迹散落

如珠

九年四月辛巳北方有大流星尾迹長五丈光芒照地至右攝提西三尺滅

十一年正月壬辰夜有流星長二丈餘出天井之西有尾迹

十三年七月庚寅有星色白尾長一丈五尺東南入濁八月己未東方一大流星其色赤西流至危滅

十五年五月己亥西北有大流星長二丈餘出北斗魁南抵軒轅而滅

其年七月癸亥有大流星出鉤陳南至婁北滅

長慶元年正月丙辰南方有大流星色赤尾有迹長三丈光明照地出狼星北三尺東北流至七星南三尺滅其年七月己丑東方有大流星色黃有尾迹長六七丈光明照地出西北西流至羽林滅

二年八月丙子東方有大星西流至昴滅有聲如雷

四年七月丙子有大星出天大將軍東北流入濁滅

其年十二月甲午夜西北有流星出閣道至北極滅

寶曆元年閏七月庚子有流星出北極至南斗柄滅

二年七月丙戌日初入有流星向南滅八月丙申北方

有大流星長四丈餘出王良流至北斗杓滅
太和四年六月辛未自昏至戌夜流星或大或小不能
數
九年六月二十三日有流星縱橫大小約有二十餘出
沒多近天河

開成元年十一月十日西方有流星大如一斗器光明
照地尾跡凝著天良久不滅出上台經中台西北滅
三年四月二十一日東方有流星尾跡凝著天良久不
滅出天市中帛星經宗人星東南滅

其年七月六日未後東北方有流星尾跡光明三丈餘
滅其聲如雷九月五日北方有流星尾跡凝著天光明
照地至室宿向南滅

四年二月二十六日從四更至五更上方及四方約有
流星大小共二百餘並西流皆有尾跡長一丈或三丈
至五丈三月二十三日一更至五更上方及四方有流
星大小百餘交橫出滅

其年八月辛未夜有流星出羽林尾長八十餘尺滅後
有聲如雷十月二十六日南方有流星尾跡凝著天光

明照地出參右足近九旂南滅
會昌元年六月二十九日從一更至五更有小流星五十餘于四方交橫散流七月二日北方有流星光明照地東北流有聲如雷十一月六日有大流星光明照地東北流有聲如雷

六年二月丁酉東北有流星色赤其光燭地尾跡入大角西流穿紫微

武德六年七月二十日雋州山崩川水咽流

貞觀八年七月七日隴右山崩大蛇屢見太宗問秘書監虞世南曰是何災異對曰春秋時梁山崩晉侯召伯宗而問焉對曰國主山川故山崩川竭君爲之不舉樂降服出次祝幣以禮焉晉侯從之故得無害漢文帝九年齊楚地二十九山同日崩文帝出令郡國無來貢獻施惠于天下遠近歡洽亦不爲災後漢靈帝時青蛇見御座晉惠帝時大蛇長三百步經市入廟今蛇見山澤蓋深山大澤實生龍蛇亦不足怪也惟修德可以銷變上然之

永徽四年八月二十日隕石十八于同州馮翊縣光耀有聲如雷上問于志寧此何祥也當由朕政之有闕也對曰春秋隕石于宋五內史過曰是陰陽之事非吉凶所生自古災變杳不可測但恐物之自然未必關于人事今陛下發書誠懼責躬自省未必不爲福也

開元十七年四月五日大風震雷藍田山開百餘步大歷十三年十一月郴州黃岑山摧震壓殺數百人貞元十五年正月柳州藍山縣山摧得古鍾四枚

水災上

貞觀十一年七月一日黃氣竟天大雨穀水溢入洛陽宮深四尺壞左掖門毀宮寺一十九所漂六百餘家申書舍人岑文本上疏曰伏惟陛下覽古今之事察安危之機上以社稷爲重下以億兆爲念明選舉慎刑罰進賢才退不肖聞過卽改從諫如流爲善在于不疑出令期于必信頤神養性省畋遊之娛去奢從儉減工役之費務靜方內而不求闢土載橐弓矢而無忘武備凡此數者惟願陛下行之不怠則至道之美與三五比隆雖桑穀龍蛇猶當轉禍爲福變咎爲祥況水雨之患陰陽

常理豈可謂之天譴而繫聖心哉特進魏徵諫曰昔貞觀之始聞善若驚暨五六年閒猶悅以從諫自時厥後漸惡直言雖或勉強時有所容非復曩時之豁如也謬之士稍避龍鱗便佞之徒肆其巧辨謂同心者爲朋黨謂告奸者爲至公謂強直者爲擅權謂忠讜者爲誹謗謂之朋黨雖忠信而可疑謂之至忠雖矯僞而無咎強直者畏擅權之議忠讜者慮誹謗之尤至于竊發生疑投杼致惑正人不得盡其言大臣莫能與之爭熒惑視聽鬱于大道妨治損德其在茲乎而欲無水之災不

可得也十三日詔曰暴雨爲災大水汎濫靜思厥咎朕甚懼焉文武百寮各上封事極言朕過無有所諱諸司供進悉令減省凡所作役量事停廢遭水之處賜帛有差二十日廢明德宮及飛山宮之元圃院分給河南洛陽遭水戶九月黃河汎濫溢壞陝州河北縣及太原倉毀河陽中潭幸白司馬坂以觀之

永徽五年六月七日滹沱河水泛溢損五千三百家總章二年七月益州大雨壞居人屋宇凡一萬四千二百九十家害田四千四百九十六頃九月十八日括州

海水翻上壤永嘉安固二縣百姓廬舍六千八百四十
三家溺死人九千七十牛五百頭田四千一百五十頃
咸亨四年七月二十七日婺州暴雨山川泛溢溺死者
五千人

永淳九年五月十四日連日澍雨二十三日洛水溢壞
天津橋損居人千餘家

文明元年七月温州大水損四千餘家

如意元年七月一日洛水溢損居人五千餘家

神龍元年七月二十七日洛水暴漲壞百姓廬舍二千

餘家溺死者數百人八月一日以水災令文武九品以
上直言極諫右衛騎參軍宋務光上疏曰伏見明制令
文武九品以上直言極諫大哉德音真堯舜之用心禹
湯之罪己也臣嘗謂天人相與之際休咎冥符之兆有
感必通其閒甚密是以政失于此變生于彼亦猶影之
象形響之赴聲動而輒隨各以類應故曰天垂象見吉
凶聖人象之竊見自夏已來水氣悖戾郡國多罹其災
去月二十七日洛水暴漲漂損百姓臣謹按五行傳曰
簡宗廟廢祭祀則水不潤下夫王者卽位必郊祀天地

嚴配祖宗是故鬼神歆饗多獲福助自陛下光臨寶極
縣厯炎涼郊廟遲留不時殷薦山川寂寞未議懷柔水
之貽災殆因此發臣又按水者陰類臣妾之道陰氣盛
滿則水泉迸溢加以虹蜺紛雜澍雨滯淫雖丁厥時而
汨常度亦陰勝陽之沴也臣恐後庭近習或有離中饋
之職干外朝之政伏願陛下深思天變杜絕其萌以萬
方爲念不以聲色爲娛以百姓爲憂不以犬馬爲樂暫
勞宵旰用緝明良豈不休哉夫災變應天實繫人事故
日蝕修德月蝕修刑若乃雨暘或愆則貌言爲咎雲縈

之法存乎禮典今暫降霖雨卽閉坊門棄先聖之明訓
遵後來之淺術時偶中之安足神耶蓋當屏翳收津豐
隆戢響之日也豈有一坊一市遂能感召皇靈暫開暫
閉便欲發揮神道必不然矣何其謬哉至今巷議街談
共呼坊門爲宰相謂能節宣風雨變理陰陽天工人代
乃爲虛設悠悠蒼生復何望哉尙書右僕射唐休璟以
水雨爲害咎在主司上表曰臣聞天運其工以人代之
而理神行其化爲政資之以和得其理則陰陽以調失
其和則災沴斯作故舉才而授帝惟其難論道于邦官

不必備頃自中夏及乎首秋郡國水災屢為人害夫水陰氣也臣實主之臣忝職右樞致此陰沴是不能調理其氣而曠居其官雖運屬堯年則無治水之用位伴殷相且闕濟川之功猶負明刑坐逃皇譴皇恩不棄其若天何昔漢家故事丞相以天災免職臣竊遇聖朝豈敢覲顏居位乞解所任待罪私門冀移陰咎之徵復免夜行之責

二年四月洛水漲壞天津橋損居人廬舍死者數千人

唐會要卷四十四

水災下 宋 王 溥 撰

開元八年六月二十一日東都穀洛漚三水溢損居人九百六十一家溺死八百一十五人許衛等州田廬蕩盡掌關兵士溺死者一千一百四十八人十四年七月十四日灋水暴漲入洛損諸州租船數百艘損租米十七萬二千八百石十八日懷衛鄭汴滑濮大兩人皆巢居死者千計

大曆四年京師大雨水斗米直八百佗物稱是命閉市北門置一土臺臺高五尺上置五方壇壇上立一黃幡以祈晴

貞元三年閏五月東都河南江陵大水壞人廬舍汴州尤甚揚州江水泛漲

四年八月連雨灞水暴溢溺殺渡者百餘人

八年八月河北山南江淮凡四十餘州大水漂溺死者二萬餘人又幽州奏七月大雨水深一丈己上鄭涿薊檀平等五州并平地水深一丈五尺十月徐州奏從五

月二十五日雨至七月八日方止平地水深一丈二尺苗田屋宇漂蕩倒塌村閭向盡百姓多就高處及移居鄰郡

十一年復州竟陵等三縣遭朗蜀二水泛漲沒溺損戶一千六百六十五田四百一十頃

十二年福建等州大水六月嵐州暴雨水深二丈餘損屋宇田苗

十五年鄭滑大水

十八年蔡申光等州水賜物五萬段米十萬石鹽二千

石以賑貧民

永貞元年九月朗州武陵龍陽二縣江水暴漲漂萬餘家十一月京兆府長安等九縣山水泛漲害田苗

元和元年十二月幽州徐州水損田苗

二年蔡州上言大水平地水深八尺

三年京師大雨水

四年七月渭南縣暴水泛溢漂損廬舍二百一十三戶

秋田十有六頃溺死者千人命京兆府發義倉救之

七年正月振武界黃河溢毀東受降城五月饒撫虔吉

信五州山水暴漲沒毀廬舍虔州尤甚深處四丈餘

八年許州大水摧大隗山其年六月庚寅京師大水風

雨毀屋揚瓦人多壓死者水積於城南深數丈餘入明

德門猶漸車輻辛卯渭水暴漲絕濟者一月時所在霖

雨百源皆發川澮多不由故道

九年十二月淮南宣州大水

十一年五月昭應雨水漂溺居人是月衢州山水湧出

三丈餘壞州城百姓溺死損田千餘頃是月浮梁樂平

二縣暴雨百姓溺死者一百七十人其為漂泛不知所

在者四千七百戶闕兩稅錢三萬五千貫十一月潤常陳許等州以水害聞田不發者萬餘頃十二月京兆府水害田苗潤常湖衢陳許六州大水

十二年六月京師大雨含元殿一柱傾市中水深三尺壞坊民二千家河北水災邢洛尤甚平地或深二丈十三年六月淮水溢壞人廬舍十二月奉先等十一縣水害麥田

十五年九月滄景大雨敗田三百頃壞屋舍二百九十間又江西奏吉州大水

長慶二年七月好畤山水泛漲漂損居人三百餘家其月詔陳許兩州災頗甚百姓廬舍漂溺復多言念疲氓豈忘救卹宜賜米粟共五萬石充賑給以度支先於管內見收貯米粟充本道觀察使審勘責所漂溺貧破人戶量家口多少作等第分給聞奏

寶曆元年七月乙酉鄜坊大水九月華州暴水傷稼

太和二年六月陳州水害秋稼八月京畿奉先等十七縣水

三年七月宋亳水害秋稼

四年九月舒州太湖宿松望江大水災溺民戶六百八十詔本道以義倉斛斗賑貸

其年十一月京畿河南江南湖南等道大水害稼詔本道節度觀察使出官米賑給

五年六月蘇杭湖三州雨水害稼東川奏元武江水漲二丈壞梓州羅城人廬舍

六年二月以去歲蘇湖大水宜賑貸二十二萬石以本州常平義倉斛斗充給

八年十一月滁州奏清流等三縣四月雨至六月諸山

發洪水漂溺戶一萬三千八百

開成二年八月山南東道諸州大水田稼漂盡丁酉詔大河西南幅員千里楚澤之北連互數州以水潦暴至堤防潰溢既壞廬舍復損田苗言念黎元罹此災沴宜令給事中盧宣邢郎中崔璿宣慰

火

貞觀二十三年三月少府監甲弩庫火

證聖元年正月十六日夜明堂災至明並爲煨燼

景龍四年二月東都凌空觀殿宇並煨燼唯一真人獨

存目有淚迹

開元十八年二月十一日大雨雪俄又震雷飛龍殿災
天寶二年六月七日應天門觀災延至左右延福門經
日火不滅

九年三月西嶽廟災

十年正月陝州運船火燒船二百一十五隻損米一百
萬石舟人死者六百人商人船數百隻八月六日武庫
災燒二十八間十九架燒兵器四十七萬件
廣德元年十二月二十五日夜鄂州失火燒船三千隻

延及岸上居人三千餘家死者四千餘人

貞元七年四月蘇州大火

十三年正月東都尚書省火

十九年四月家令寺火

二十年四月開業寺火

元年四年三月御史臺佛舍火當直御史李應罰一季
俸

七年六月鎮州甲仗庫火延燒一十三間兵器皆盡王
承宗久畜叛謀至是兇氣稍息

十年四月河陰轉運院火盜所爲也是日昏暮有盜發於河橋凡數十人縱發弓矢人吏奔駭因祚毀院門又東藁蕪火以焚之十一月盜焚獻陵寢宮永巷

十一年十一月元陵火罰李祐一月俸十二月未央宮及飛龍草場火

十二年五月神龍寺火

十四年十一月戊寅度支火

十五年正月京師西市火焚死者眾

太和二年十一月禁中昭德宮火延燒宣政殿之東垣

及門下省至晡北風起火勢益甚迨暮方息初火發上命神策兵士救之公卿內臣集於日華門外御史中丞溫造不到與兩巡使崔蠡姚合等各罰一月俸
八年五月飛龍神駒中殿火
九年六月西市火

開成四年十二月乾陵火

會昌三年六月萬年縣東市火燒屋貨財不知其數又

西內神龍宮火

大順二年七月汴州相國寺佛閣災是日曉微雨震電

寺僧見塊火在三門樓藤網中良久火發復飛越前殿延燒佛閣二夕方止

木冰

儀鳳三年十一月十四日雨木冰

其月三十日黃門侍郎同三品來恒卒明年正月十日戶部尚書許圜師卒庚戌尚書右僕射戴至德薨

開元二十九年十一月二十二日雨木冰凝寒凍裂數日不解寧王憲見而嘆曰此俗謂之樹架諺曰樹生架達官怕必有大臣當之其死矣二十四日寧王憲薨大曆二年十一月辛未紛霧如雪草木冰

螟蟻

貞觀二年六月十六日終南等縣蝗上至苑中掇蝗數枚呪之曰人以穀為命而汝食之是害吾百姓也百姓有過在予一人爾若有靈但當蝕我無害百姓將吞之侍臣曰恐致疾遽來諫止上曰所冀移災朕躬何疾之避遂吞之自是蝗不為災

開元四年五月山東諸州大蝗分遣御史捕而埋之汴州刺史倪若水拒御史執奏曰蝗是天災自宜修德劉聰時除既不得為害滋深宰相姚崇牒報之曰劉聰偽

主也德不勝妖今日聖朝也妖不勝德古之良守蝗蟲避境若言修德可免彼豈無德致然今坐看食苗忍而不救因此飢饉將何自安卒行埋瘞之法獲蝗一十四萬石投之汴水流下者不可勝數朝議喧然上復以問崇崇對曰凡事有違經而合道有反道而適權者彼庸儒不足以知之縱除之不盡猶勝養以成災上又曰殺蟲太多有傷和氣公其思之崇對曰若救人殺蟲致禍崇所甘心八月二十四日己卯勅河南河北檢校殺蝗蟲使狄光嗣康瓘敬昭道高昌賈彥璿等宜令待蟲盡

看刈禾有次序卽入京奏事諫議大夫韓思復以爲蝗是天災當修德以禳之恐非人力所能翦滅上疏曰臣聞河南河北蝗蟲頃日更益繁熾經歷之處苗稼都損今漸翮飛向西游食至洛使命來往不敢昌言山東數州甚爲惶懼且天災流行埋瘞難盡臣望陛下悔過責躬發使宣慰損不急之務召至公之人上下同心君臣一德持此至誠以答休咎前後驅蝗使等伏望總停上出韓疏付姚崇崇乃請思復往山東檢視蝗蟲所損之處還具實奏

唐會要 卷四十四 九
興元元年四月自春大旱麥枯死禾無苗關中有蝗百姓捕之蒸暴颺去足翅而食之明年五月有蝗起自東海西至隴坻羣飛蔽天旬日不息所至苗稼無遺八月大旱關輔以東穀大貴餓饉枕道并皆無水國用裁可支七旬人心大恐

開成二年六月魏博淄青河南府並奏蝗害稼七月乙酉京兆尹李紳奏蝗入京畿不食民田詔書褒美仍刻石於相國寺以紀之
三年八月魏博六州蝗食秋苗並盡

四年十二月鄭滑兩州蝗兗海中都等縣並蝗
五年四月鄆州兗海管內並蝗又汝州有蟲食苗五月河南府有黑蟲生食田苗汝州管內蝗兗海臨沂等五縣有蝗蟲於土中生子食田苗六月淄青登萊四州蝗蟲河陽飛蝗入境幽州管內有地蝻蟲食田苗魏博河南府河陽等九縣沂密兩州滄州易定鄆州陝府虢州六縣蝗

會昌元年三月鄧州穰縣蝗
咸通三年五月淮南河南蝗

九年江夏飛蝗害稼

光啟二年二月荆襄仍歲蝗米斗三十千人相食

雜災變

貞觀十三年四月二十九日雲陽石燃方丈晝如灰夜
即光見投草木於其上則焚歷年乃止

十七年閏六月司農寺豕生子一首八足自頸分爲二
體

其年七月京師訛言官遣椹椹殺人以祭天狗云其來
也身衣狗皮指如鐵爪每於暗中捕人必取人心肝更

相震怖皆設弓矢以自防太宗惡其妖訛遣通夜開諸
坊門宣旨慰諭稍定

永徽五年七月萬年宮有小鳥生大鳥

龍朔元年十二月二十八日洛州言貓鼠同居

調露二年突厥溫傅等未叛有鳴鷄羣飛入塞相繼蔽
野邊人相驚曰此名突厥雀南飛突厥犯塞之候也至
二年正月還復北飛至靈夏已北悉墮地而死視之則
無頭矣裴行儉問於右史苗神客曰鳥獸之祥乃應人
事何也對曰人雖至靈而稟性含氣同於萬類故吉凶

兆於彼而禍福應於此聖人受命龍鳳爲嘉瑞者和氣同也故漢高斬蛇而驗秦之必亡仲尼感麟而知己之將死夷羊在牧殷紂以絕鸚鵡來朝魯昭出奔鼠舞端門燕刺誅死大鳥飛集昌邑以敗是故君子虔恭寅畏動必思義雖在幽獨如承大事知明神之照臨懼患難之及己也雉昇鼎耳殷宗側身以修德鵬止坐隅賈生作賦以敘命卒無患者德勝妖也

垂拱元年九月二十四日揚州地生毛如馬鬣

長壽三年三月大雪鳳閣侍郎蘇味道以爲瑞修表將

賀左拾遺王求禮止之曰三月降雪此災也乃誣爲瑞

若三月雪是瑞雪臘月雷爲瑞雷乎乃止

神龍二年三月九日洛陽東七里有水影側近樹木車馬皆歷歷影見水中月餘乃滅四月己亥雨毛於越州之鄆縣也

景龍元年九月十八日有赤氣竟天其光燭地經三日止

唐隆元年六月八日虹蜺竟天

開元十五年七月四日雷震興教門兩鴟吻欄檻及柱

災

蘇氏駁曰東海有魚虬尾似鴟因以為名以噴浪則
降雨漢柏梁災越巫上厭勝之法乃大起建章宮遂
設鴟魚之像於屋脊畫藻井之文於梁上用厭火祥
也今呼為鴟吻豈不誤矣哉

天寶元年十月一日魏郡上言猫鼠同乳經二十六日
望編入史冊詔從之

寶應元年七月西北方有赤氣亙天貫紫微漸流於東
彌漫北方照耀數十里也

大曆三年六月二十四日隴右節度使奏隴右汧源縣
趙貴家猫鼠同乳獻以為瑞中書舍人崔祐甫上議曰
中使吳承倩宣進止以猫鼠示百寮者臣聞禮曰迎猫
為其食田鼠也然則猫之食鼠載在禮典以除其害則
雖微必錄今此猫對鼠而不食仁則仁矣無乃失其性
乎猫受人養棄職不修亦何異於法吏不勤觸邪疆吏
不勤扞敵又按禮部式具列三瑞無猫不食鼠之目以
茲稱慶臣所未詳

建中四年京師地生毛

貞元二年正月大雨雪平地深尺餘雪上有黃黑色狀如浮埃五月日有黑暈自辰及申方散

四年正月上御丹鳳樓宣赦是日含元殿前階檻三十餘間崩甲士死傷者十餘人又陳留雨木皆大如指長寸餘每木有孔通中所下其立如植二月太僕郊牛犢生六足太僕卿周皓白宰臣李泌請上聞泌戲答之而不許其時京城民家豕生子兩首四足以白御史中丞竇參亦不許上聞七月自陝州至河陰水盡黑其黑水流入汴河止於汴州城下一宿而復又鄭汴二州羣鳥

皆去界內入田緒李納境內銜木爲城高二三尺緒納令焚之信宿復如之鳥口多流血

十年十一月有大鳥飛集宮中食雜骨數月獲之不食而死

十二年十二月大雪平地二尺竹多死環國王所獻犀牛甚珍愛之是冬凍死

十七年二月丁酉京師雨雹己亥雨霜戊申夜霆震雨霜庚戌大雨兼雹

元和元年京師大風折樹

三年四月大風毀含元殿西闕欄干十四間七月六日舒州上言桐城縣梅天陂內有青黃白三龍自陂中乘風雷躍起高二百尺凡六里入浮塘陂

八年三月丙子大風壞崇陵寢殿鴟吻折門戟六月四日長安西市有豕生子三耳八足自尾分爲二

長慶二年六月乙亥大風震墜太廟鴟吻霹御史臺樹皆仆其年十一月頻雪後恒燠水不冰凍草木萌發如正二月

四年六月庚辰大風吹敗延喜景風門

寶曆元年十二月乙酉夜有霧起須臾遍天霧上有赤氛或深或淺久而乃散

開成元年閏五月有羣鳥萬餘集唐安寺逾月方散

四年四月壬戌有響出太廟

大中十一年十二月舒州奏有鳥人面綠毛喙皆紺色其聲曰甘人呼之爲甘蟲

咸通元年七月戊戌白虹橫互西方十一月丁酉戌時妖星初出如匹練互空化爲雲而沒在楚分

廣明元年四月大雨雹大風拔京兩街樹十二三東都

長夏門內古槐自拔而仆殿宇鴟吻皆墮地

中和元年五月大風天雨土

二年七月丙午夜西北有赤氣如絳竟天其年九月太原上言諸山桃杏有花結實其年十月西北無雲而雷鳴天狗墮

光啟二年九月白虹見西方

光化二年春有白氣竟天如練自西南徹東北而旋天祐元年四月東京大風雨土跬步不辨物色日暄稍止是年昭宗移洛陽車馬以其日入京城而有是變朱

氏革命之兆也

其年十一月辛酉有日黃色白暈旁有青赤紐

太史局

久視元年五月十九日改太史局爲渾天監不隸秘書省天后召尙獻輔拜太史令固辭曰臣久從放誕不能屈事官長遂改爲渾天監至七月六日又改爲渾儀監長安二年八月二十八日獻輔卒渾儀監依舊爲太史局隸秘書省監官並廢至景龍二年六月二十六日改爲太史監罷隸秘書省景雲元年七月二十八日又改

爲太史局隸秘書省八月十日改又爲太史監十一月二十一日又改爲太史局二年閏九月十日又改爲渾儀監開元二年二月二十一日又改爲太史監十五年正月二十七日改爲太史局隸秘書省至天寶元年十月三日改爲太史監罷隸秘書省至乾元元年三月十九日太史監改爲司天臺仍置五官正五人司天臺內別置一院名之曰通元院應有術藝人並徵辟到京皆於通元院安置司天臺總置官六十員大監一人從三品少監二人正四品上丞三人正六品上主簿三人正

七品上主事二人正八品下五官正各一人正五品上五官副正各一人正六品上五官靈臺郎各一人正七品下五官保章正各一人從七品上五官挈壺正各一人正八品上五官監候各一人正八品下五官司厯各一人從八品上五官司晨各三人正九品上觀生厯生七百二十六人其臺宜於永寧坊張守珪宅置制曰建邦設都必稽元象分曹列局皆應物宜靈臺三星主觀察雲物天文正位在太微西南今興慶宮上帝廷也考符所合以置靈臺宜令所司量事修理舊置在秘書省

南至寶應元年六月九日司天少監瞿曇謨奏司天丞請減三員監候減二員司辰減七員五陵司五員勅旨依初天寶十三載三月十四日勅太史監官除朔望朝外非別有公事一切不須入朝及充保識仍不在點檢之限

大足元年九月十九日勅在史局厯生天文觀生等取當色子弟充如不足任於諸色人內簡擇
開元二十三年九月八日勅太史局厯生每番留兩人當上餘並七月一日上至十月三十日下

乾元元年十月一日權知司天監韓穎奏司天臺五官正既職配五方上稽五緯臣請每至正冬朔望朝會及諸大禮并奏本方事各依本方正色其冠上加一星珠仍永爲恒式從之

大曆二年正月二十七日勅艱難以來疇人子弟流散司天監官員多闕其天下諸州官人百姓有解天文元象者各委本道長吏具名聞奏送赴上都

開成五年十二月勅司天臺占候災祥理宜秘密如聞近日監司官吏及所由等多與朝官并雜色人交游既

乖慎守須明制約自今以後監司官吏並不得更與朝官及諸色人等交通往來仍委御史臺訪察

雜錄

武德九年八月詔私家不得輒立妖神妄設淫祀非禮祈禱一切禁斷龜易五兆之外諸雜占亦皆禁止

載初元年六月勅相書及朔計家書多妄論禍福並宜禁斷

開元十年六月勅百姓不得與卜祝人交遊往來

唐會要卷四十五

宋 荆國公王 太常卿 溥 撰

功臣

武德元年八月六日詔曰朕起義晉陽遂登皇極經綸天下實仗羣材尚書令秦王右僕射裴寂或合契元謀或同心運始並蹈義輕生捐家殉節艱辛備履金石不移論此忠勤理宜優異官爵之榮抑惟舊典勳賢之議宜有別恩其罪非叛逆可聽恕一死其太原元謀勳效者宜以名聞及所司進簿尚書右僕射裴寂納言劉文

靜加恕二死左驍衛大將軍長孫順德右驍衛大將軍
劉宏基都水監趙文恪右屯衛大將軍竇琮衛尉少卿
劉政會鴻臚卿劉世龍吏部侍郎殷開山左翊衛大將
軍柴紹內史侍郎唐儉庫部郎中武士護驃騎將軍張
平高左驍衛長史許世緒李思行李高遷等並恕一死
三年二月十日詔曰貴爵尙齒列代通規進善優賢有
國彝訓尙書左僕射魏國公寂太子少保新昌縣公綱
左武侯大將軍陳國公抗太常卿沛國公元璿納言漢
東郡公叔達內史令宋國公瑀兵部尙書蔣國公通戶

部尙書滎陽郡公善果右武侯大將軍羅侯御史大夫
滑國公无逸並職司近侍任兼心膂恩禮所加義從隆
渥寂已下奏事及侍立並令升殿其年三月隋尙舍奉
御郭宏道來歸引見帝泣曰臣識龍顏在天下之先今
拜闕庭在眾人之後遂拜同州刺史每參見奏事並升
殿

九年九月二十四日詔曰褒賢昭德昔王令典旌善念
功有國彝訓吏部尙書上黨縣公長孫無忌中書令臨
淄縣侯房元齡右武侯大將軍尉遲敬德兵部尙書建

平縣男杜如晦左衛將軍全椒縣子侯君集等或夙預
謨謀綢繆帷幄竭心傾懇備申忠益或早從任使契闊
戎麾誠著艱難績宣內外義冠終始志堅金石誓以山
河實允朝議無忌封齊國公元齡封邢國公敬德封鄂
國公如晦封萊國公君集封潞國公其食邑各三千戶
遣侍中陳叔達於殿階下唱名示之上謂曰朕敘公卿
勳勞量定封邑恐不能盡當各自言從叔父淮安王神
通進曰義旗初起臣率兵先至今房元齡杜如晦等刀
筆之人功居第一臣竊不伏上曰義旗初起人皆有心

叔父雖得率兵未嘗身履行陣山東未定受委專征建
德南侵全軍陷沒劉黑闥翻動望風而破今計勳行賞
元齡等有籌謀帷幄定社稷之功所以漢之蕭何雖無
汗馬指蹤推轂故得功名第一叔父于國至親誠無所
愛但以不可緣私濫與勳臣共賞耳初將軍邱師利等
咸自矜其功或攘袂指天以手畫地及見淮安王理屈
自相謂曰陛下以至公行賞不私其親吾屬何宜妄訴
貞觀六年九月宴于慶善宮時有班居尉遲敬德上者
敬德怒曰汝有何功合坐我上任城王道宗因解諭之

敬德拳毆道宗目幾眇太宗不憚而罷嘗謂敬德曰朕舊覽漢史見漢高祖功臣獲罪者多意常尤之及居大位以來恒欲保全功臣令子孫無絕然卿居官輒犯憲法方知韓彭夷戮非漢祖之愆國家大事惟賞與罰非分之恩不可數行勉自修飭無貽後悔數年敬德遂飛鍊金石閑居服雲母粉穿築池臺常奏清商樂以自奉養不與外人交通凡十六年至顯慶三年十月卒許敬宗請加贈上曰敬德功業誰之儔也對曰武德末年二凶構亂經綸中興之業能置宗廟之安者敬德功當第

一太尉無忌曰敬德早從征伐勳庸茂著貞觀之初特效殊績比諸將帥超越等倫李靖南定荆吳北平突厥外內之功雖別論其勳效實宜相準上以爲然遂贈司徒并州都督兼代州都督大將軍檢校司空公封上柱國十七年二月二十八日詔曰自古皇王褒崇勳德旣勒名於鐘鼎又圖形於丹青是以甘露良佐麟閣著其美建武功臣雲臺紀其跡司徒趙國公無忌司空河間王孝恭故司空萊國公如晦故太子太師鄭文貞公徵司空梁國公元齡開府儀同三司右僕射申國公士廉開

唐會要 卷四十五 四
府儀同三司鄂國公尉遲敬德特進衛國公靖特進宋
國公瑀故揚州都督褒國忠壯公志元輔國大將軍夔
國公宏基故尚書左僕射蔣國公通故陝東道大行臺
尚書右僕射鄖國公開山故荊州都督譙襄公紹故荆
州都督邳襄公順德洛州都督鄖國公張亮吏部尚書
陳國公侯君集故左驍騎大將軍邲襄公公謹左領軍
大將軍盧國公程知節故禮部尚書永興文懿公虞世
南故戶部尚書渝襄公劉政會戶部尚書莒國公唐儉
兵部尚書英國公李世勣故徐州都督胡壯公秦叔寶

等二十四人宜酌故實宏茲令典可並圖畫于凌煙閣
庶念功之懷無謝于前載旌賢之義永貽于後昆
永徽三年十二月二十八日勅功臣貞觀二十三年已
來簡退者特宜同致仕例其太原元從及秦府左右仍
各加階先有正四品者不在此例

五年二月四日詔屈突通殷開山並贈司空長孫順德
贈開府儀同三司竇琮贈特進史大奈贈輔國大將軍
溫大雅贈尚書右僕射權宏壽贈太子少師劉政會武
士護並贈并州都督張公謹贈荊州都督李高遷贈涼

州都督李思行贈洪州都督張平高贈潭州都督時武
昭儀用事贈其父故引功臣以贈之
總章元年三月六日詔太原元從西府舊臣今親詳覽
具爲等級贈司徒士夔贈司空開山贈司馬淮安王神
通并州都督劉宏基贈并州都督劉政會并州都督唐
儉左衛大將軍竇琮荊州都督長孫順德涼州都督史
大奈贈幽州都督龐卿憚潭州都督錢九隴贈華州刺
史柴紹贈潭州刺史張平高贈工部尚書裴寂洪州都
督李思行洪州都督秦行師贈靈州都督許世緒涼州

都督李高遷齊州刺史劉義節贈太尉高士廉贈司空
屈突通贈太尉房元齡贈司空杜如晦贈司徒尉遲敬
德揚州都督段志元益州都督程知節徐州刺史秦叔
寶涼州都督宇文士及荊州都督張公謹荊州都督杜
君綽荊州都督公孫武達荊州都督李安遠代州都督
鄭仁泰荊州都督李孟嘗幽州都督獨孤彥雲始州刺
史劉師立等並立爲第一功臣其家見在朝無五品已
上官者子孫及曾孫擢一人授五品官若先有四品五
品者加授子孫等一人兩階若三品已上加爵三等其

第二等功臣見在朝無五品已上官者其子孫及曾孫擢一人授從六品若有五品已上者加一階六品官者加兩階三品已上官者加爵一等時皇后欲褒崇其父特在功臣之上故也

神龍元年七月制段志元屈突通蕭瑀李靖秦叔寶長孫順德劉宏基宇文士及錢九隴程知節龐卿憚竇琮苑君璋李子和張平高張公謹梁恪仁安修仁秦行師獨孤彥雲蘇定方李安遠鄭仁泰杜君綽李孟嘗等二十五家所食實封並依舊給

其年九月勅自宏道以前經任相三年已上及秦府晉府寮佐四品已上并食實封功臣雖經罪責不致破家子孫無任京官者特宜優與一官英府周府舊寮五品已上子孫亦宜準此
至德二載十二月朔日赦文扈從劔南締構靈武冊勳三十三人太子太師幽國公韋見素加開府儀同三司實封三百戶開府儀同三司齊國公高力士加實封三百戶右龍武大將軍潁川郡公陳元禮封蔡國公實封三百戶左龍武大將軍田長文封雁門郡公實封二百

戶右龍武大將軍張崇俊封南陽郡公實封二百戶左
羽林大將軍杜休祥封馮翊郡公實封二百戶尚書左
僕射裴冕加開府儀同三司封冀國公實封三百戶殿
中監同正員判行軍李輔國加開府儀同三司殿中監
判行軍事封成國公實封五百戶宗正卿兼工部侍郎
李遵加特進封鄭國公實封二百戶鴻臚卿中軍都虞
候李鼎開府儀同三司封保定郡公實封一百戶鴻臚
卿同正中軍都知兵馬使管崇嗣封鉅鹿郡公實封二
百戶右武衛大將軍王競加特進太原縣侯封一百戶

尚書左僕射同中書門下平章事朔方軍節度使子儀
加司徒代國公實封一千戶鴻臚卿朔方兵馬使僕固
懷恩封豐國公實封二百戶左金吾衛大將軍四鎮伊
西北庭行軍兵馬使李嗣業加兼衛尉卿封虢國公實
封二百戶司徒兼戶部尚書太原尹同中書門下平章
事薊國公光弼加司空兼兵部尚書封魏國公實封八
百戶御史大夫兼工部尚書招討兩京并定武威武興
平等軍兼關內節度使河西隴右伊西四鎮行軍兵馬
使王思禮加開府儀同三司封霍國公實封三百戶太

常卿司正兼御史大夫淮南西道節度採訪使潁川郡公來瑱加開府儀同三司潁國公實封二百戶太僕卿南陽太守知襄陽郡事金鄉公魯炅加開府儀同三司岐國公實封二百戶京兆尹京畿採訪計會招召宣慰使崔光遠加特進禮部尚書鄴國公實封三百戶開府儀同三司李光進封范陽郡公實封二百戶左相苗晉卿加特進行侍中韓國公實封五百戶憲部尚書同中書門下平章事李麟加金紫光祿大夫封襄國公實封五百戶中書侍郎同中書門下平章事崔圓加特進中

書令趙國公實封五百戶中書侍郎同中書門下平章事河南節度採訪使張鎬加銀青光祿大夫南陽郡公太子少師房瑋加金紫光祿大夫清河郡公太子少保虢王巨加光祿大夫御史大夫趙國公李峘加金紫光祿大夫戶部尚書吏部尚書郇國公韋陟加金紫光祿大夫禮部尚書李峴加光祿大夫兼御史大夫京兆尹封梁國公戶部侍郎蘇震加銀青光祿大夫吏部侍郎大曆十四年閏五月詔司徒兼中書令汾陽郡王子儀賜號尚父兼太尉中書令加實封通前二千戶月給千

五百人糧二百匹馬芻穀
其年六月一日制武德已來宰相及實封功臣子孫沈
翳者量與一人正員官七月二十六日吏部請委史館
精加檢勘審定名跡至建中元年九月五日史館奏武
德已來實封陪葬配饗功臣名跡崇高者十一人第一
等司空魏國公裴寂納言魯國公劉文靜太尉趙國公
長孫无忌尚書左僕射衛國公李靖司空英國公李勣
中書令漢陽王張柬之中書令博陵王崔元暉侍中平
陽王敬暉侍中扶陽王桓彥範中書令南陽王袁恕已

尚書左僕射徐國公劉幽求二十四人第二等司空河
間王孝恭開府儀同三司鄂國公尉遲敬德特進莒國
公唐儉輔國大將軍夔國公劉宏基左驍衛大將軍薛
國公長孫順德行臺尚書左僕射蔣國公屈突通行臺
尚書左僕射鄖國公殷開山戶部尚書渝國公劉政會
工部尚書應國公武士護荊州都督譙國公柴紹揚州
都督襄國公段志元右驍騎大將軍郟國公張公謹右
領軍大將軍盧國公程知節徐州都督胡國公秦叔寶
禮部尚書永興縣公虞世南工部尚書武陽縣公李大

亮散騎常侍豐城縣男姚思廉左武侯大將軍邢國公
蘇定方夏官尚書耿國公王孝傑右武衛大將軍韓國
公張仁愿光祿卿琅琊郡公王同皎兵部尚書代國公
郭元振尚書左丞相燕國公張說兵部尚書中山郡公
王峻等三十四人第三等司空淮安王神通特進江夏
王道宗中書令郢國公宇文士及行臺左僕射鄴國公
竇軌大府卿葛國公劉義節左屯衛大將軍襄武郡公
劉師立右驍衛大將軍梁國公安興貴右武衛大將軍
申國公安修仁左衛大將軍譙國公竇琮夔州都督息

國公張長遜黔州都督夷國公李季和右光祿大夫羅
國公張平高左監門大將軍榮國公樊興左武侯大將
軍郇國公錢九隴右武侯大將軍沔陽郡公公孫武達
左武衛大將軍懷寧縣公杜君綽右驍衛將軍安化縣
公龐卿暉涼州都督廣德郡公李安遠涼州都督同安
郡公鄭仁泰刑部尚書吳興郡公沈叔安右領軍大將
軍號國公張士貴左驍衛大將軍畢國公阿史那社爾
右武衛大將軍琅琊郡公牛進達輔國大將軍嘉州郡
公周護仁右武侯大將軍天水郡公邱行恭尚書左僕

射宋國公唐休璟右羽衛大將軍遼陽王李多祚吏部
尚書齊國公崔日用戶部尚書越國公鍾紹京左武衛
將軍平陽郡公薛訥右金吾大將軍涼國公李延昌光
祿卿申國公許乾輔中書侍郎趙國公王琚持進鄧國
公張暉等至德已來將相功効明著已亡歿者八人第
一等尚書左僕射冀國公裴冕吏部尚書清河郡公房
瑁門下侍郎衛國公杜鴻漸開府儀同三司武威郡王
李嗣業衛尉卿顏杲卿常山郡太守袁履謙御史中丞
張巡將軍南霽雲八人第二等太尉臨淮王李光弼兵

部尚書涼國公李抱玉司空霍國公王思禮御史大夫
劉正臣范陽長史賈循尚書右僕射信都郡王田神功
左羽林大將軍薛景偃睢陽太守許遠七人第三等太
子太師幽國公韋見素侍中韓國公苗晉卿尚書左僕
射趙國公崔圓尚書右僕射辛雲京尚書右僕射扶風
郡王馬璘右散騎常侍太原尹鄧景山史館奏按史傳
考詳事實約爲三等具列如前勅旨宜付尚書省百寮
與史官對定奏聞

建中元年十二月勅國初以來將相功臣名跡崇高功

效明著者宜差次分爲二等
其月定武德已來宰臣以房元齡杜如晦蕭瑀高士廉
魏徵王珪戴胄岑文本馬周劉洎褚遂良于志寧張行
成高季輔拜瑗來濟張文瓘郝處俊李義琰裴炎蘇良
嗣狄仁傑姜師德王方慶王及善魏元忠姚崇朱敬則
蘇瓌宋璟魏知古陸象先蘇頌張嘉貞李元紘韓休張
九齡三十七人爲上等實威陳叔達等四十人爲次等
功臣以裴寂劉文靜長孫无忌河間王孝恭李靖李勣
尉遲敬德屈突通殷開山劉宏基長孫順德唐儉柴紹

段志元劉政會張公謹程知節秦叔寶虞世南李大亮
蘇定方王孝傑張柬之崔元暉敬暉桓彥範袁恕已張
仁愿劉幽求崔日用郭元振張說王琚王峻三十四人
爲上等淮安王神通等五十人爲次等至德以來將相
旣歿者以裴冕房瑄杜鴻漸李嗣業劉正臣顏杲卿袁
履謙張巡許遠盧弈南霽雲十一人爲上等李光弼等
十五人爲次等

二年六月中書令郭子儀自蒲來朝子儀勳伐居最代
宗不名常呼爲大臣洎幸陝還賜以鐵券圖形凌煙閣

及上卽位恩禮益厚每謁見乘肩輿入自光順門以造
內殿崇貴近古無匹旣病上御紫宸殿命舒王謨制書
省之是日子儀薨上聞傷痛久之爲廢朝五日冊命曰
尊爲尙父官協太師雖爵秩則同而禮望尤重斂以袞
冕旌我元臣聖祖園陵所宜陪葬軾墓重文侯之德象
山追去病之勳千載如存九原可作可贈太師仍令所
司備禮冊命贈絹三千匹布千端米麥三千石凶喪所
須並令官給及葬上御安福門臨哭送之百寮陪位特
賜諡爲忠武配饗代宗廟庭

興元元年正月一日赦文諸軍諸使諸道應赴奉天及
進收京城將士等宜並賜名奉天定難功臣身有過犯
遞減罪三等子孫有過犯遞減二等四月詔諸軍從奉
天隨從將士並賜名元從功臣從谷口以來
隨從將士賜名元從功臣

貞元元年八月詔九廟配饗功臣封爵廢絕者宜令紹
封以時饗祀

三年三月冊拜李晟爲太尉依前兼中書令

四年詔爲晟立五廟贈晟高祖之隴州刺史贈曾祖嵩

唐會要 卷四十五
澤州刺史贈祖思恭幽州大都督及令官給牲牢祭器
牀帳禮官贊儀以祔焉尋詔晟長子愿爲嫡嗣兼監察
御史特拜銀青光祿大夫太子賓客賜上柱國使其得
列榮戟五年九月晟與侍中馬燧召見于延英殿上嘉
其有大勳勞乃詔曰昔我烈祖乘乾坤之滌盪埽隋季
之荒屯體元御極作人父母則有熊羆之士不二心之
臣左右經綸參翊締構昭文德恢武功威不若康不义
用端命于上帝俾懷柔于四方宇宙旣清日月旣正王
業旣成太階旣平乃圖厥容列于斯閣懋昭績效表式

儀形一以無忘于朝夕一以永垂于來裔君臣之義厚
莫重焉貞元己巳歲孟秋七月我行西宮瞻宏閣崇構
見老臣遺像颯然肅然和敬在色想雲龍之叶應感致
業之艱難覩往思今取類非遠且功與時並才爲代生
苟蘊其材遇其時尊主庇人何代不有在中宗則桓彥
範等著匡戴之績在元宗則劉幽求等申翼奉之勳在
肅宗則郭子儀埽殄氛祲今則李晟等保寧朕躬咸宣
力肆勤光復宗祏繼之前烈夫豈多謝闕而未錄孰謂
旌賢況念功紀德文祖所爲也在予曷其敢怠有司宜

唐會要 卷四十五
敘年代先後各圖其像列于舊臣之次仍令皇太子書
朕是命紀于壁焉庶永播嘉庸昭示天下俾後之來者
知元勳之不朽于是史官考其功績第其前後以褚遂
良蘇定方郝處俊等二十七人充之復命皇太子書其
文以賜晟刻石于門左

七年二月詔授張巡男去病涇陽令許遠男峴饒州司
馬南霽雲男承嗣溫州別駕顏真卿男羣府河中戶曹
參軍顏杲卿孫謨左內率府兵曹參軍旌忠烈之後也
九年八月太尉兼中書令西平郡王晟薨上聞之震悼

出涕比大斂遣使親致書于柩前曰皇帝遣宮闈令第
五守進伸旨于故前太尉兼中書令西平郡王贈太師
之靈曰天祚我邦是生才傑稟陰陽之粹氣實山岳之
降靈宏濟艱難保佑王室埽盪氛祲廓清上京忠誠感
于人神功業施于社稷匡時定亂實賴元勳方將與國
同休永爲邦翰比嬰疾恙雖歷旬時日冀痊除重期相
見弼予在位終致和平豈圖藥餌无徵奄至薨逝君臣
之義追慟益深循省遺章倍增感切卿一門允嗣朕必
終始保持況愿等兄弟承卿教訓朕之志意豈忘平生

唐會要 卷四十五
卿縱不言朕亦存信比者卿在之日卻未見朕深心今卿與朕長乖冀知朕誠志無以爲念發言涕零是用躬述數行遣中所懷得盡臨紙遣使不能飾辭魂而有知當體朕意時初城鹽州復鹽池上賜宰臣新鹽惻然思晟命致鹽于靈座又時遣中使至晟第存撫諸子教戒備致每聞其子愿等有一善上喜形于色鴻勳盛業恩寵始終自古及今無與晟比其年十月司徒兼侍中馬燧對于延英殿初燧以足疾許不朝謁是日燧以冬首朝請上召對命無拜而坐謂之曰曩故太尉晟常與公

俱來今獨覩公不覺悲慟歔歔久之旣而燧請退病甚仆于地不能興上親起之送于階命中貴人扶掖燧頓首泣謝而出先是燧自平汴宋魏博河中其功益高上乃下詔褒美遷光祿大夫兼侍中并賜宸扈台衡二銘并序勒石于起義堂西偏上爲題額其恩寵如此十七年三月成德軍節度使檢校太尉兼中書令王武俊薨廢朝五日羣臣詣延英奉慰如渾瑊故事太常諡曰威烈上曰武俊竭忠奉國賜諡忠烈竟陰曰蘇瓌元和二

府司錄參軍崔元暉孫元方張說孫罄並爲監察御史
狄仁傑孫元範爲左拾遺敬暉孫元亮袁恕己孫師德
相次錄用焉

四年三月上覽貞觀故事嘉魏徵諫諍匪躬詔令京兆
尹訪其子孫及故居則質賣更數姓析爲九家矣上愍
之出內庫錢二百萬贖之以賜其孫稠及善馮等禁其
質賣

六年九月勅奉天定難功臣子孫有犯殺人宜令所司
準法其餘並準處分

八年勅張茂昭立功河朔舉族歸朝義烈之風史冊攸
載如聞身歿之後家無餘財追懷舊勳特越常典宜歲
賜絹二千匹春秋二時支給

其年八月詔曰君臣運合故徇國以忘家勸賞義明在
褒功而顯節存則酬其爵祿歿則錄其子孫然後忠義
不遺典章斯在故磁晉隰等州觀察使檢校兵部尙書
康日知故徐州刺史兼御史大夫李洧等一十家皆有
懋功藏于盟府故命搜訪後裔光賁前人今志寧等或
服戎著緒或從官有成或投迹軍府之中或滯才州縣

唐會要 卷四十五
之職咸皆甄錄各茂官榮庶乎有祿者无忘于聿修懷
忠者使其必報勉膺光寵無替前勞
十五年六月勅以大理正段文通爲殿中侍御史前准
南營田副使殿中侍御史顏頤爲員外郎長安縣丞顏
諗權知大理正渭南縣尉郭承嘏爲監察御史并準二
月五日制勳閔之後可任臺省官者故有此命
太和二年六月詔曰朕詳觀列聖紀冊祖宗盛業燦然
在前其或道有汚隆政有善否未始不繫乎當時
常因便殿言諸宰臣勉其匡益協心推戴且以去歲乙

已登應門敷大號俾疇賢相以訪遺裔或血食不繼宗
祊已蕪如遂良之委笏面諍名垂史書仁傑之恢復廟
社事形先覺宋璟之文吏骨鯁功參治平元紘之守規
畫一時成有裕其胄僅存不絕若髮各授邑吏使其自
試故中書令褚遂良五代孫虔可汝州臨汝縣尉內史
狄仁傑曾孫元封懷州修武縣尉侍中宋璟曾孫渤岳
州沅江縣尉中書侍郎李元紘曾孫伉鄧州向城縣尉
大中二年正月三日勅節文功臣墳墓無子孫者委所
在長吏差人巡檢

其年七月十一日史館奏績選堪上凌煙閣功臣除所有舊圖形并有子孫在中外任官令寫進外三十七人禮部尚書兼門下侍郎平章事李峴侍中永寧郡公王珪吏部尚書戴胄中書令岑文本中書令馬周中書令兼修國史韓瑗侍中兼修國史郝處俊納言婁師德文昌左相王及善同鸞臺鳳閣平章事朱敬則侍中梁國公魏知古尚書左丞中書門下同三品陸象先中書令張九齡司空魏國公裴寂納言魯國公劉文靜中書令漢陽郡王張柬之中書令博陵郡王崔元暉侍中扶陽

郡王桓彥範尚書左僕射劉幽求兵部尚書郭元振吏部尚書房琯常山郡太守袁履謙北庭行營節度使李嗣業主客郎中河南節度副使張巡睢陽太守許遠御史中丞盧奕右驍衛將軍南霽雲中書侍郎蕭華中書侍郎張鎬司徒李勉平章事監修國史張鎰門下侍郎蕭復兵部侍郎平章事柳渾檢校司空平章事賈耽北平郡王馬燧東都留守李愷勅旨宜令御史臺散牒諸州尋訪子孫圖寫真形進送
三年四月宰臣奏伏以勳德之後慶賞所延每有恩制

唐會要 卷四十五
多令訪錄所以興廢繼絕尊賢報功事歸勸獎義主沈翳近日諸家自論者眾吏曹官闕合用者稀縱欲比擬亦未詳悉應前件兩色子孫準前後制勅令搜訪與官者望許於吏部陳狀便委磨勘如審是嫡嗣未有官名者具狀聞奏非時與一正員解褐官如有出身及已曾任官者選日優與處分如自以才行嘗登科第及有諸房子孫不承祭祀并及先因獎錄已授正官者並不在此限卽冀所加恩例式叶本條勅旨宜依
咸通九年正月五日安南觀察使高駢奏愛州日南郡

北五里有故中書令河南元忠公褚遂良墓前都護崔耿大中六年因訪邱墳別立碑記云顯慶三年歿于海上殯于此地二男一孫附焉伏乞尋訪苗裔護喪歸葬從之仍勅嶺南各委本道搜訪如有褚氏事跡相類者尋訪聞奏當加優憫

乾符六年十月京兆府奏故尚父子儀廟因霖雨倒塌勅減賜御膳錢三千貫雇丁匠修築仍令所司明年仲春以太牢祭于廟時禮部員外郎崔祐甫與諫官俱稱過當章疏屢上宰臣亦相次奏之惟中書舍人李拯上

疏請行前詔乃以太牢祀之而是非相半其月勅以故
衛國公李德裕孫延吉起家爲集賢校理與韓偓同
天祐元年七月中書門下奏西都舊有凌煙閣盡圖國
初功臣今遷都東京乞委營造一閣圖寫梁王全忠勅
旨令于皇城內擇地營造仍賜名天祐旌功之閣

九
本大中六年因舊泚泚立
亦正里齊坊中書令河南元忠公辭海夏其前隨顯

